

劉齋集

卷三

言跋
雜著

5563.8
3024.1
v.3

共七

BERKELEY
LIBRARY
UNIVERSITY OF
CALIFORNIA

Opportunity

剛齋先生集卷之五目錄

序

水北亭詩集序

芝峯實記序

靈汀集序

晉州鄭氏族譜序

牧村遺稿序

草洞八賢行錄序

養浩堂實記序

竹川集重刊序

全州崔氏族譜序

遜壑實蹟序

滄浪高公實蹟序

南平文氏族譜序

西湖忠烈錄序

守拙齋柳公和遺稿序

三塘集序

孝子雲溪申公實蹟序

谷山韓氏族譜序

伴梅堂詩集序

河東鄭氏族譜序

翠巖遺稿序

西齋實記序

槐山三綱錄序

耕隱實記序

四佳黃公遺蹟序

徐素菴詩集序

懶齋序

久菴事實序

咸陽吳氏族譜序

魯溪李公 斐 遺稿序

晚默堂集序

中和齋姜公事蹟序

茂松庾氏族譜序

六後稷重修序

喚醒菴遺稿序

坡州牧使金公年譜序

義士 贈大司憲李公 述原 實蹟序

四禮正變序

全州李氏族譜序

萬頃盧氏族譜序

恩津世稿序

栗翁遺稿序

剛齋先生集卷之五

序

水北亭詩集序

癸亥反正靖社正倫名正理得有以元勳至親不肯
參謀而屏跡疎燬自不失其義者水北亭金公是已
公生于嘉靖丁巳幼少受讀孝經至資父事君乃
曰孝者忠之本也及長根究經傳奧義以求實用不
但文藝是尚而已登第于宣廟己丑聲望甚著昏
朝以直諫不容於朝周流郡邑廢母議起自楊州
棄官而歸仁廟初政召以副提學亦不膺命其

答昇平以伊霍孰與夷齊者可以知其素定矣公遺
稿未及刊而遭回祿收拾燼餘者只詩什若干篇而
亦多不完公諸後孫將以活字印出來問序於余嗚
呼公以高才偉器不得展布其所蘊文稿失傳又無
以考詳其言議甚可惜也然黃秋浦申象村徐藥峯
諸公皆公之所忌形者而沙溪先生又樂與之往還
則此非見木而可以知山者耶今此零碎之編雖若
無所輕重猶足爲全鼎之一爨則固不可以不傳余
非知詩者何敢爲之序竊念孟子以誦讀詩書而不
知其人爲不可而必使論其世也遂略書之如此公

諱興國襄景公諱承靈六世孫而昇平塗其從姪云
芝峯實記序

數端廟諸臣三相爲稱首余讀野史每激昂欽歎
乎其受顧命盡臣分而皇甫公則未聞其子孫有
無常切慨恨一日有投名者見其姓字不覺驚喜亟
與延接乃是相公後裔而以芝峯先生實記一冊求
爲之序余謹受而繙閱蓋略述公立朝顛末爲年譜
兼取伸雪褒獎諸文蹟釐爲上下篇者也噫公忠節
之卓炳若日星今於累百載之下人之誦慕者殆若
隔晨然實記有無夫何加損竊念朝家所以褒錄

之勤實遵乎 光廟當屯常秦之訓辭則公之爲公
宐觀於是而 列聖愍忠獎節之盛德有不可不使
後人知之者至若配食於 莊陵門外之壇崇報之
典更無餘憾而九原有知公亦應感泣然則是記之
編固所以詳公之實蹟有得乎對揚之道而亦可謂
有補世教矣豈其可已者耶吾先子文正公論節齋
金相公院享位次曰功亦相埒功蓋指開拓六鎮也
夫以公忠義勲勞宐其子孫之盛且顯而今十餘世
其僅存於淪落沉廢之餘者數不過三十餘云可勝
爲之嗟惜然能竭其誠力編此刊印以爲久遠之圖

斯其爲昌大之漸歟其裒輯編次者曰婉曰涉也鳩
工鋟梓者曰度曰濬曰祐曰然也而爲之校正者永
川士人李遠欽也其始終幹事而今來請文者曰材
也余陋劣無文且甚病昏第爲托名之榮強起而略
書之如此云

雪汀集序

余嘗讀雪汀李公行狀於吾先子遺文中得公實蹟
之詳而亦知兩家契誼之厚今公後孫鏐將刊行公
遺集遣其弟錫持示余屬以弁卷之文余竊幸又見
公文章雖知非人其何敢辭顧有所不能焉者欲論

其詩文也則非惟見識淺陋公登第清陰金文正公
薦其才調爲翰林吾先子亦稱公少好經書精究文
義故其所述作自有根本非徒事藻繪者比矣叟何
以加評欲述其事行也則非惟文辭荒拙已取文字
之凡關於公者編爲附錄覽者自可知之矣亦安用
贅說余以是謝於李君李君曰雖然終不可無序只
書所以劄刷之意可矣嗚呼孟子曰誦其詩讀其書
不知其人可乎然則知其人者亦豈可不誦讀其詩
書耶閱是集而考附錄者其於公之淡於仕進而當
事盡職關於謀身而報國殫誠必有所欽仰感歎

惜其不得柄用於明時而知詩文之幽於公者不可
以不傳於後也遂書此以歸之

晉州鄭氏族譜序

晉州鄭氏族譜刊布未五十年而今重刊者以其舊
譜未能盡收諸派故也分派既遠遂成路人勢所難
免自諸派而溯其源則乃一人之身而已修譜牒而
當入者見漏豈程子所論使人不忌本之意也鄭氏
族蕃散居舊譜之失無足怪焉而其以是爲病遠近
合謀圖所以重刊者固甚善矣按鄭氏著自麗代名
德相望而全我朝忠莊公忠節偉然尤爲後人之

所欽誦櫟泉宋公序于舊譜而揀揚至矣其餘若倡
義於壬辰扶倫於癸丑諸公忠孝之風不沫前徽亦
皆可稱而忠顯公野隱宋先生又其外裔也猶歟盛
矣閱是譜其有不肅然而起敬者耶仍竊念忠孝之
性人之所得於天者然苟不學以明之所以爲忠爲
孝又何以盡其分也譜中稱察奉諱希勉之學行且
載其言曰人欲淨盡後顏子之樂處可知也此雖寂
寥十餘字實周茂叔每令尋之要旨而非實見得者
無以說得如此矣然譜不言其所從學豈其得之於
家者然耶然則鄭氏之多忠孝蓋必有所本而惜乎

其無以考證也嗚呼譜中派系皆自文英公來而文英公墓久已失傳鄭氏諸族積誠尋覓卒乃筮得誌石於墓間而復修香火固可謂孝感神明而族譜重刊之役適成於是時亦似非偶然也已窳奉公後孫尚烈屬余序之曰子亦鄭氏之彌甥不宜辭焉輒忘其蕪拙而謹書之如此云

牧村遺稿序

嗚呼士之治舉業者鮮不以古人爲己之學看作別件物事矣生長僻鄉而能讀書求志不爲俗習所移者爲尤難若牧村金公諱光億果非其人耶公之胤

琰來訪袖函公遺稿曰非欲鈔梓而播布將藏于家
以示子孫願得一言以弁諸卷余以不文辭不獲遂
受之而卒業詩文摠若干篇而所言率多治心修身
之方其自警而勉人者意深而言懇使讀之者有足
以感發焉至若送子從師及戒勗其師門胤子二書
丁寧反覆之間又可以想見其所自爲者矣余之固
陋雖未得叩質於公之平日今閱斯稿聳然起敬祝
若奉良誨於左右則其爲幸也夫豈淺淺哉世之工
聲病鬪華靡徒悅人耳目者類多剗刷而行之其視
斯稿果何如也然則金君之言豈以其所編之少耶

抑守公謙挹之遺意也歟余無筆力可能發揮略書其所感于心者如此琰卽承公命而摳衣於過齋先生之門者也

草洞八賢行錄序

錦城西二十里有山水名區曰草洞 嘉靖萬曆間洞有李竹潭惟謹張野憂以吉鄭滄洲詳柳寒泉澍崔三洲希說李錦崖彥詳柳南湖澱崔莎村四勿諸公相繼登第卽輿地勝覽所稱八文官是也一時人物之盛雖系乎昭代休運豈山水亦有明麗之應耶八公築精舍於洞之北寶山之下以時講習訓導後

進至今數百餘年州之人士欽誦不衰而八家後承
克守遺規相與尊理故精舍亦得以無恙焉張公侑
齋憲周文雅士也從余遊一日袖示八公行錄而曰
八賢生並一世居在一洞所講究者經傳也所砥礪
者名節也或厄于時或短於命不能展布所蘊而考
其所成就則實非尋常朝士之比而遺風餘韻有足
以起後人者吾鄉已舉祭社之禮於寶山精舍追述
其事蹟以詔來遊於精舍者文獻無徵草率如是甚
可慨惜願得一言以弁諸卷此吾鄉諸長老之意也
嗚呼余之陋劣固非其人且諸公之賢有請業於金

河西奇高峯二老之門而蒙獎與托契於朴忠菴鄭
松江尹梧陰諸賢之間而見推重斯足以不朽而其
見幾於陰陽消長之際倡義於島夷猖獗之時者自
可以垂後矣至如竹潭三洲二公之胤昏朝樹立之
卓尤可驗家庭所受之正又何待余言而發揮也八
家後承思欲闡揚先美惟在自修之如何耳是則所
可爲之致勉者而抑又有所感焉者余性好山水一
至草洞周覽其勝槩因登精舍想像諸公當日之趣
則豈非快事顧衰病不可得可恨也已遂書此以塞
張君之請

養浩堂實記序

世之數麗末忠賢者指必先屈於圃牧而有能盡心於所事全節於改社堂堂義烈可以匹休於二先生者養浩堂禹忠靖公是已 朝家之褒獎累加士林之誦慕不衰至我 正宗甲辰乃暇享於圃老松陽之祠猗歟盛矣忠靖之孫浣遺其族孫聲海以養浩堂實記二冊徵余弁卷之文是記蓋取公詩疏各一篇爲首仍次 列聖手教及麗史節略及後賢稱述諸篇以著公之始終末又錄圃牧諸傳以明其一致公之疏文雖不多而其所抱負亦可見矣余奉閱訖

斂手而謝曰是記之編所以對揚 聖德而不但詳
於公之事蹟欲知圃牧之爲圃牧者亦將考諸是而
得之編之之意固甚善而亦可謂有補世教矣余之
荒陋誠不足以發揮而序之也禹君之請愈益力遂
書此以歸之

竹川集重刊序

退陶之門有學行篤實而名位不顯濶爲先生所推
許而不甚見知於後人者竹川先生朴公是已公之
孫在煥以公文集及附錄編爲二冊者來示余曰吾
先祖詩文散逸於兵火寥寥若是而刊行固已有年

矣顧舊本校讎不精且有遺漏者若干篇諸子孫合謀欲重刊幸加考閱而仍賜一言以弁諸卷余謹受而讀之其紆餘平淡可知爲盛世文章舊序所論盡之矣寧容復贅他說惟其門人牛山安公所撰行狀歷數湖南儒學之盛而乃曰高峯之議論一齋之剛毅眉巖之博識世所罕見而論其踐履則於我先生未知孰優余素高安公之風節凌知斯言之非阿好自不覺歛衽起敬而竊歎余之固陋今始得其徽蹟也至若壬辰之亂再倡義旅而爵賞之加固辭不已又豈非晦翁所謂有本者固如是也耶嗚呼孟子以

誦讀詩書而不知其人爲不可而必使論其世也欲
知公者觀於其所受授庶可得焉余實無文不足以
爲序而淺有所感于心者遂略書之如此云

全州崔氏族譜序

崔氏籍全州者其遠代昭穆失次於是譜系者各從
其斷然可知者始焉則遂分而爲三祖於高麗進賢
館太學士完山府院君文忠公諱羣玉者其一也譜
云宋哲宗元祐元年文忠公奉使上賀時司馬呂范
諸公薦程伊川爲崇政說書又薦公爲門下侍郎及
伊川罷公亦論事見罷而還噫以外國使臣被薦授

官于中朝明時者其事已是超絕况薦罷乃與伊川同其顛末乎雖其文章事業未有所考千載之下足以知其賢然則若晚六公養罔僕之節梅村公湜居喪之禮愛日公應參養親之誠其卓偉敦篤實有不容言者而其可曰靈芝無根醴泉無源耶且歲靖公七夕南征大勳至獲賜名之殊寵而再受封於完山以晚六從祖而為誌晚六者所引重亦甚盛矣禦侮公得男之壬辰原從參議公聃齡之從於倡義又其流風之益遠而後人之所不可不知者凡譜於是者既知其來處又能考蹟而感奮思所以無忝則歐陽

氏所云傳家四以者必不待勉而後能之也譜旣成
崔生運秦光岳洙一來問序於余辭以陋拙不獲遂
略述其世德以致欽尚之意始終殫誠於譜事者晚
六公十五世孫復一云

遜壑實蹟序

世之譚 端廟忠臣者必曰死六生六然死六之外
死者不但一二若遜壑宋公暨其再從兄西齋忠剛
公又豈非生六外之生者耶惟其生也故其忠也益
危其節也益苦視死者固無遜焉况同其生者乎數
生六者指先屈於金梅月南秋江而公卽梅月秋江

之切友也公以蔭仕末官 端廟遜位乃與忠剛公

謝世遯跡以沒其身其於梅月秋江真可謂生同志

死同傳者矣今去公之世數百餘年文獻殆乎無徵

而獨有公所為遯壑記及往復於西齋秋江數書尚

傳于家使後之人得以考乎公之志節豈不甚奇且

幸也公始屏退於壺山之楸下及 端廟上仙復深

入於任實縣西新安之伯夷峯下築小亭揭遯壑二

字而足跡不出門外嗚呼峯之得名造物者之意豈

其有待於公者耶若西齋公所以論記文之作相與

戒勗之間足以見二公之苦心於千載之下而公之

答西齋公梅月之評又可知其言議之平正的確矣
欲求二公之實蹟者舍是數書奚以哉 正宗辛亥
褒贈西齋公而再 命內閣立傳苟使傳之者知有
此書而收錄以備 睿覽則不惟西齋自靖之實彌
得其彰亦應 聖朝顯忠之政並及於公而惜乎其
未能也湖南士林相與立祠于遺址而俎豆之可見
公議之不泯後又以公後孫距墨時熊孝行著聞追
配焉嗚呼忠孝本無二致可謂有所授受又况距墨
之盡分於方喪實非人之所可及者耶猗歟休哉公
諸後孫將劖劂之以壽其傳附以家狀及小傳名之

曰遜整實蹟而曰必東基濂來問序於余余辭以不
文不獲遂略書所以感慨之意如此云

滄浪高公實蹟序

滄浪高公敬履以霽峯從弟爲沙溪門下士自少種
學有氣節以親命成進士亦不屑於公車之業當光
海初年抗章辨牛溪松江之誣黨人慕之禁錮以沒
世湖南多士乃爲公伸辨而齊聲叫閤焉歷數百年
至 正宗丁巳以士論躋享于鄉祠 純宗戊子

萬明代聽以扶正斥邪馳贈以臺職嗚呼此乃公之
終始也亦可見百世之公議也今其後孫貞鎮收拾

遺文僅六七首附錄諸文字各以實蹟將刊行于世
噫其少矣然余觀其天君傳戒子書滄浪賦諸篇皆
是躬行心得之語非驚外尚華者比也有斯學乃有
斯節嘗纒可以知鼎亦何恨其少耶余於此重有所
感焉公之玄孫可成當吾先于文正公遠竄蓬海之
日呈疏伸救被罰停舉是祖是孫其事絕類繼述之
美吁亦可敬也貞鎮勗以世誼督以弁卷之文余不
敢以老病辭強書數語以塞其請云

南平文氏族譜序

南平文氏其鼻祖新羅三韓壁上功臣武成公實蹟

甚有奇偉者其傳世則自高麗平章事敬節公始敬
節六世而受封別籍者曰江城伯江城伯四世而有
諱益漸爲麗末名臣木綿東來衣被億兆蓋其功也
至我 太宗朝錄勳贈職封江城君而諡忠宣復以
其有罔僕之節 特命旌闔大聖人所作爲豈不出
尋常萬萬也自江城而別籍者又幾家皆出於江城
君其所以別籍多無可據之實而貫南平者只江城
君同七代若干人而已於是諸族各修其系合爲南
平譜各派世德之表著者取其誌狀及稱述詩文諸
篇爲卷首而並及於姓鄉區別其重本收族意固甚

善而所以致其審慎詳密者亦可謂至矣嗚呼世之譚文氏者只知有江城君舉江城事實者輒以木綿爲言木綿之利及生民實永世不可忘者而朝家之爲之褒贈存恤後裔亦以是也則無怪其然其關異崇正之學忘身殉國之節尤何等卓偉而又其家世宜其有江城矣乃反有所不能詳者豈非甚可慨者耶譜旣成江城君後孫鍾九以幣至謁余爲序余之固陋因此而得其始終本末之大槩則自幸者淺遂不以不文辭而於楓菴以下諸文字益歎其忠義之有自來矣惜乎今不振之久也今旣譜系矣各

自飭勵惇行孝悌思所以無忝則可以復期乎昌大
者其在是夫抑有一事可疑者譜中力辨甘泉之文
本非一根而有所考據矣然則我先祖尤菴文正公
之銘審判掌令二文公墓何以敘其源於南平也此
雖因本家所錄而二文公是已卯賢則其世系之錯
謬乃如是耶殊不可知也

西湖忠烈錄序

宣廟癸巳倭寇陷晉州而梅窩宋公梯殉節光海丙
辰建虜入富寧而鈞隱宋公德駟立殫二公南陽人
鈞隱卽梅窩公之兄子也至 正宗丁巳始旌贈二

公及梅窩配具氏榜其間曰雙忠一烈具氏聞公死
血指書一絕于壁而遂絕水穀以沒忠烈之萃于一
家噫其甚盛而其顯晦固有時矣鈞隱公後孫啓弼
以西湖忠烈一冊來問序於余曰今將刊印以壽其
傳願有以徵諸後是錄蓋取文字之關於二公者分
爲三篇而上中冠之以二公詩文數首兼附具氏血
書絕句者也夫二公精忠壯節昭載於公私文蹟久
爲人之所欽誦而乃蒙 聖朝褒嘉之典於二百年
之後具氏烈行之卓固其天稟之特異而梅窩公刑
家之化亦不可誣焉則二公者已自不朽况旌贈時

卷之五

一

恩綸鄭重懇摯迥出尋常垂耀於無窮者乎且是錄也纖悉該備於二公之始終本末而梅窩公圍城聯句及上家兄書益知其素養之厚釣隱公船制書與監營牒可見其才略之槩矣人之考閱者宜無不感歎而激昂顧何待於序文而徵也既又考其家乘則高麗左獻納寅梅窩公之五世祖而麗亾固守罔僕之節釣隱公從子應南丙子難以義兵別將戰死于京畿之光教山二公之忠義其有所自來而亦可謂有所往矣於不休哉余實無文不足以揄揚其萬一宋君之請甚力遂略書之如此西湖與陽縣之里號

而二公之所世居云

守拙齋柳公和遺稿序

嗚呼守拙柳公早年登第進塗方闢而分館之初見
枳於鑄黨性又骯髒不能俯仰於權貴門遂潦倒於
郎署郡邑以沒其世惟遺稿若干卷藏在巾衍纂集
無序交豕多舛而其卓犖之志堅確之操猶有可考
信者焉吾先子文正公之以禮禍北謫南遷火色彌
天公委佗修候濩以不能躬進爲歎於疎齋李公西
浦金公之流徙困欲亦皆繾綣勞問於窮微絕島不
以禍福動心其慕尚乎賢德篤厚於故舊當求之於

往牒中最是請斬趙嗣基一疏義理明正辭意峻截
足以有辭於後世矣公之後承陵替思欲刊印以壽
其傳而力有所不逮可勝為之傷歎哉柳君浚浚暨
聖養持示余俾為弁卷數行以待早晚剞劂以余為
公之彌甥故也余實無文顧何可辭第其詩文之聲
調格力非余懵陋所敢議到遂略書感慨于心者如
此云

三塘集序

士人金炳升以其先祖三塘公詩文及附錄合編者
一冊子來示之曰吾先祖詩文散佚無存今收拾其

見錄於公私文蹟者及墓文家狀只若干篇將活字
印出以傳諸後不可無弁卷數行敢以爲請余幼育
於九潭之外家稔聞金氏居素耀者之爲名族固不
宜辭其勤托顧余非可以重公者且公文章之典重
纖麗爲一時諸名勝所推許而詞律至登於箕雅其
聲調格力之如何又豈淺陋所敢議到第念公早歲
釋褐以藝文待教倡同僚首伸史禍諸賢之冤明正
之見的確之辭讀其疏者百載之下足以起欽而居
家孝友莅官廉潔亦有人所不可及者此非金氏之
所以爲名族者耶考公之世是清陰文正公之曾伯

祖也蓋其家風因亦可想之醴根源其有所本歟詩
文之出於公者宜為人之所愛翫而一羽可以知全
屬何必多乎哉今其子孫之致力於斯編非直為追
先之私公誦於人亦可以無歉焉遂書此以歸之

孝子雲溪申公實蹟序

孝子雲溪申公後孫宗濂載祚遠自丹陽之潁峽持
示一冊子曰此吾先祖實蹟也將刊印以壽其傳其
中旌闕碑所書甚詳而尤菴老先生之所不辭者矣
今宜有弁卷數行於此而不可以他求是以裹足而
來余謹受之而盟手卒業蓋古孝子卓異之行無不

備於公之一身而其他可敬服而足以爲法於後世者指又不勝屈若不近不正之色不見不義之壻其操守之正且確尤非無素養者所可能也猗歟盛矣夫豈不曰孝者百行之源而王孟諸人其亦有是也耶嗚呼旌表門閭旣蒙 聖祖之褒典繪傳實事又有三綱之續錄則公之至行固已赫赫照人耳目而顧此冊于碑表行狀之外並取邑誌及古老傳說後人記述而務致纖悉求公終始者可以益知其所未知矣世降俗渝民不興行然其秉彝之得於天者固未嘗泯焉考觀於斯其不有感奮激發而知所勸者

耶然則所以刊印雖曲於闡揚先徽之孝思而其有
補於風教者亦太矣但諸申力不贍人無有相助者
將不得廣布云爾則是可歎惜也已余實蕪拙不足
以序之而深感申君勤意略書此以爲托名之榮焉

谷山韓氏族譜序

谷山韓氏居于慶州者修其族譜蓋來自中國而爲
其鼻祖者高麗侍中平章事諱鏡其始傳世次者修
文殿直學士諱璿入我朝以勲業文章大顯者判
書平節公諱雍集賢殿校理諱卷平節公沒于金山
之庄舍至其孫司正叔老徙居慶州其爲嶺南人舊

矣司正以後世稍不振然至今不失爲士族而人不
以其無宦達而少之苟非文行相傳何以如是嗚呼
嶺之爲士者病於黨論雖名家後裔鮮有不獲罪於
醜正者獨韓氏毅然自守不見磷緇若進士是愈其
族弟配愈酷遭刑禍於夙巖壬寅之變而不少挫撓
豈非其素定之世傳而不可奪者耶以若操執如得
見用宐其有益而嗟乎命之不齊也今旣譜系而各
知其來處矣惇行孝悌砥礪名節各思所以大厥家
聲則復見興隆其不在是耶譜將刊平節公十四世
孫公翰求爲序於余是從我遊而篤志學古者也余

實無文而不忍孤其遠來之意略書此以勉之

伴梅堂詩集序

伴梅堂者通德郎沈公壽寅肯構之所也公自爲詩以識之親戚故舊多和之者蓋公先君子嘗手植一樹梅於庭公旣嬰風樹無所寓慕乃以伴梅扁其堂昔紫陽夫子嘗以其先人印章所刻山名榜其所居矧乎此所植之物在常目之地而手澤猶存乎且梅者植物之清高者也冰雪孤標同君子之貞操黃昏暗香類幽人之潛德先公之植之也其有所取而公之伴之也亦非徒然矣朝夕摩挲宐有偉元攀栢之

悲矣風雨或至詎無休徵抱樹之痛乎公之曾孫梓
以伴梅堂詩集示余其闡發公之孝思以侈其門楣
者諸君子已盡之矣復何容贅爲詩曰維桑與梓必
恭敬止愚於是亦云爾

河東鄭氏族譜序

河東鄭氏既有族譜而一蠹文獻公先生諸後孫又
相與別爲派譜蓋以原譜不能致詳於名下註故也
將印先生十二世孫煥弼來問序於余夫譜者將以
傳乎世而徵諸後今去先生世不甚遠後承諸派又
未有燬居者則其所收錄罔或遺漏而昭穆井井若

立殓於宣祖丁酉勤王於仁祖甲子倡義於

英宗戊申諸公忠節之卓前後相望于祖有光而實

蹟記載皆得纖悉則序固在其中矣何必贅以蕪拙

之辭但先生長男直長希稷不幸嫡無嗣有庶子曰

如山而乃移統於其弟正郎希禹其重宗祀之意有

足起欽者而昏朝時如山之孫元禮諂附弘瞻藉其

勢而爲奪宗之舉仁廟改玉始上聞歸正如山餘

裔近又以活字印幽先生實記而變亂其世系他日

世變有不可知者矣先生之後而有是者可勝傷歎

哉移宗顛末不可不詳於直長公名下如或不然豈

小失也遂書此俾歸而弁諸卷

翠巖遺稿序

肅廟初服鑑穆柄用假托禮論逞其禍心羣奸趨附以圖榮利於是我先祖尤菴文正公楸棘于長髻而至發告 廟之請火色益急門人之抗章伸辨者相繼竄謫翠巖蔡公卽其一也余於公高仰其志節而甚恨無以得徽蹟之詳一日公後孫器達持示公遺稿一冊以其從兄器豐之意求爲之序詩文凡若干篇而附以師友詩札及公家狀輓誄諸文字者也余不覺驚喜而有不敢以不文辭者遂謹受之先讀疏

附錄
卷之五

二十一

本其辨誣昭奸益見爲義之勇矣次閱家狀其事親
奉先又知其本之立矣苟非講明有素深得乎義理
之正者禍在目前而無所撓奪能如是哉人之考覽
者千載之下亦必有撫卷而感慨者矣若律絕程文
諸作其聲調格力之高下淺深顧非淺陋所敢議到
而此何足有無於公哉然其幽於公者有不可不傳
則後人之並爲收錄烏得已也公諱河徵字義瑞登
上庠甚有聲名庚申夏化始筮仕卒官主簿云余無
筆力可以發揮以爲文正後裔而猥荷遠托謹書此
以歸之

西齋實記序

巡撫使西齋宋忠剛公 端廟遺臣也余嘗得公與
遜壑二書於遜壑後係偉其忠苦其節且聞其已蒙
褒顯之典而無以詳其本末則殊不勝固陋之歎一
日公之後孫錫年壽祿自湖南之興陽持示公實記
一冊而請爲序蓋編公誌狀諸文及 褒贈事實附
以公雲仍諸忠孝而是書不錄問其故則家無傳矣
惜乎其文獻之無徵也按 景泰乙亥公以都鎮撫
受 命巡撫湖南將還聞 內禪止于礪山及 端
廟遜于寧越乃進往復 命失聲痛哭而歸 端廟

賓天走入竊山服喪三年仍居于興陽海曲之馬輪
村西自號西齋而每登山臨水輒發哭人以狂翁目
之自卜地於樂安之薇原沒而葬焉齋號西而葬卜
薇者豈其微意耶蓋狀傳之作只據野史而野史之
言疎密不同故巡撫復命直向寧越差欠曲折若
縱酒大醉狂走街路及不知所之跡之十年以公所
以議金梅月者觀之未知其果如何而顧何損於公
爲忠之實也 正宗辛亥祇謁 息陵惕感 聖念
並及於當時節義諸臣而修舉闕典於是乎公始蒙
恩褒而再命內閣立傳復從多士請諡則公之忠

烈乃與辨死諸公並耀而太學倡議遠近響合立祠
俎豆於其遯跡之地所以崇報之者亦無憾矣嗚呼
不遇我 聖考顯忠之世幽潛之闡發豈得如是而
苟非公所存之寶亦何以感 天衷於數百載之後
耶立傳之至于再 聖意必有所在傳之者之不能
得公二書而載之篇中以備 睿覽殊可恨也余實
無文竊有所感于心者謹書之如此且就冊于略正
其失次者而俾編公之二書于首求公實蹟者考諸
是而有得焉則可不以僭妄罪余也耶抑又念公之
後承不沫前徽樹勳立殫相繼於壬辰丙子赫赫照

人耳目而以上論配食於公者至於五人公流風餘
韻可謂長且盛矣遯壑又是公再從弟慶元而與公
同其節者則一門多賢尤可尚也於不休哉

槐山三綱錄序

槐山郡實山僻小邑忠孝烈之可書何若是多也噫
人性之善無古今貴賤之殊而忠孝烈是性分之所
當然然氣拘欲蔽能盡分者鮮矣是以苟有卓絕之
行則爲人上者必褒旌之以礪俗而在叔季尤所當
致意但下邑窮閭其未獲上聞而終於泯沒者勢又
安得不然哉士人尹鑑烈以京華族寓居于郡西之

笑梅洞者蓋累世矣自少愛好人倫聞人忠孝實行
欽尚不已而褒典之所不及甚爲之慨惜晚暮閒居
遂錄郡之忠孝烈爲一冊予博採於公議亟收其未
蒙褒典者而名之曰槐山三綱錄其男致益袖示余
曰一鄉士論方欲刊印以示鄉之後生願得一言以
爲重余竇非其人而其勤意有不可孤者且詳其所
錄固皆甚偉而難能亦是盡分於所當爲而非人之
所不可企及者則覽之者其必感歎激昂而有所勸
矣夫奚但示一鄉而已至若黃甲申之忠於其主僕
隸之賤而莫言其行乃如是耶雖曰性善之均賦殆

亦往牒之未聞豈峽俗淳古獨能保其天真也耶世
之食若重祿而徒知其身者觀於此類必有泚錄之
者其亦有淺意矣遂強病略書此俾歸而弁諸卷

耕隱實記序

一日田進士漢自嶺南之咸陽來謂余曰我先祖耕
隱文元公遂學精忠實爲麗末名賢而年代既遠事
蹟寢晦幸有二首詩一篇文畱傳於家藏舊帖遂附
以真贊及圃隱鄭先生記夢詩復錄野史若干條于
後以著立朝榷槩而名之曰實記願得弁卷一言以
董之余謹受而卒業公妙年登第材望已著甚爲上

下之所倚重忠惠王嘗名與論古今治亂仍托二王
子而期以霍葛公涕泣受命朝衣盡濕其所以鞠躬
盡瘁者當如何而時運已去難容人力忠定王之遜
位從于江華而遂托隱于耕則卓卓乎其自靖之義
也若其詩文七歲之作乃以奉立天君竭誠輔佐爲
言生稟之異於斯可見所以戒子警學又皆本之躬
行親切的確而論敬之旨旣得聖門相傳之意又慮
其或偏而流於異端則淵淵乎其造道之正也是知
潘南朴公之惜其無壽而曰先生嘗不貳於斯者爲
篤論而精研聖學忠貫日月圃翁所稱百世可徵且

其記夢感懷傷惜意溢言外不但一時之鳴其不平而已考閱斯卷者可得公之終始大略而自不勝其激昂欽歎顧余陋拙更無可以發揮者何足爲序不以辭而略述此者只以托名爲榮而進士君之勤意亦不可孤也公諱祿生字季耕潭陽人嶺之士林立祠俎豆之於空寧云

四佳黃公遺蹟序

金堤士人黃君大年久從我遊一日袖示其先祖四佳公遺蹟一冊子而求爲之序蓋以公詩文若干篇合編墓文及院享顛末者也余旣爲公作享祝願何

以辭於此公諱居中我朝開國元勳也自古參勳
於開國者經綸事業固多可觀而能闢異端扶正學
爲世道長遠慮者復有幾人耶勝國之末釋教甚熾
殆乎家家誦佛公起豐沛翊聖朝致太平首請郡
邑寘教授訓導而擇明經飭行者以興學正俗使異
教不得肆可謂知爲國之先務而有功於衛道也公
之述作宐多可觀而今所傳寂寥若是豈不可惜然
詩之間居言志及贈郭生非專事藻繪者所能道文
之示兒輩與諸生丁寧反覆之間可以想像其所自
爲者真所謂全鼎之一爨何必多乎哉噫國朝儒

附錄
卷之五
二二五
教將興而公之闢異實爲之兆世之但以勲臣視公者豈非淺之爲知也余老病謝筆硯竊有感於心強起而略書之如此云

徐素菴詩集序

余晚寓鰲村與素菴高居分華而相近素菴時大耋而康強和辰暇日或杖屨相訪話詩文道情素壘壘恣倦公蓋今世而古人也言行淳謹襟懷坦夷本之孝友濟以文雅安分守拙杜門劬書教誨鄉鄰子弟眷眷不息余每敬服非徒其年爲可尊也間有瓊琚之投余報章所謂白屋歲將暮書窓意轉幽衿抱元

非俗生涯未見秋者蓋記寶也噫居然而千古南阡
北陌之遊不可復得而處仁之樂從茲索然矣今其
胤子志秦以公詩集若干編見示要一言弁卷余非
知詩者聲調格律之如何所不敢論抑未知公之詩
詩勝於人耶人勝於詩耶要之人固可敬則詩亦可
傳也因感平昔從遊之誼遂書此而歸之公之弟鼎
善乃荀家之季方有幾首詩附錄於此云

懶齋序

木川士人黃君存中父以懶扁齋自爲小序其胤仁
欽持示余且要余一言余未及副而仁欽遽沒惜乎

其藝業早成方切門戶之望而未免夭折也余觀於君之教子而知懶字之爲自道也及余就養於木川始得與君相見雅重之資又可驗其有所養而比豐古家遺韻未沫矣夫世之人銳於進取者汲汲於趨時炎炎於附勢馳騫乎名疆利鎖急於貨財者孳孳乎爲利役役乎謀生汨沒於求田問舍若君則棲遲一壑旣懶於進取蕭然四壁又疎於貨財無蕭怛於到老寄陶傲於容膝懶於追逐優遊而自在懶於營爲恬淡而自得君之懶其諸異乎人之頽靡不振而殆所謂曲處不知理亂不聞起居無時惟適之安者

歟余之緩數行以酬仁欽之志所不可已病喜因循而君又先我逝矣俯仰今昔曷勝愴涕余方床席沈淹朝暮待盡若終無一言將永負君父子於幽明之間矣遂強起書此送示仁欽諸弟未知死者有知或以爲不甚遲庭於當日命扁之意否耶噫

久菴事實序

洪州之魯恩洞有六臣書院其享于別祠者成摠管忠肅公而先後追賤者金徽菴大來朴駱村忠元也
合 上庚寅士論以久菴卜公儻是鄉先生而與三賢者同其節義遠近合謀詢于太學以其秋丁又追

賸焉禮既成公諸後孫取公詩文若干篇及譜序邑誌諸文字之關於公者及賸享顛末合爲一冊子而名之曰事實將以活字印出傳示後承及院儒來問序於余蓋公有篤行遂學世宗朝薦授官至掌令端廟遜位遂棄官遯跡以沒世景泰年間本朝以孝行卓異十人奏聞天朝特蒙命旌立碑紀蹟棹楔至今巋然而碑文字畫歲久漫漶不可辨故不能收錄甚可惜也嗚呼公以孝則天子表章之以忠則士林俎豆之是可以不朽於百世而生左海之偏邦蒙上國之褒典實往牒之所未聞也公之天稟

想有邁倫者而其所以資於學亦安可誣也然則是
編之成不爲無助於出入書院者之考實而在公無
足以加損顧余荒拙又何以措辭而爲之序惟公後
承之誠勤可嘉余亦有托名之榮焉遂略書此以歸
之卜氏系幽沔川高麗太師武恭公其鼻祖而於公
爲十世今請文者公之十三世孫文欽也

咸陽吳氏族譜序

吳氏咸陽族修其譜牒吳生彥浩來問序於余噫族
譜旣修矣宗支有別昭穆有序井井不紊而各其生
卒事行傍註詳焉則序復在是矣且序于譜者必據

程張之訓歐蘇之說而吳氏既自爲跋引之而相戒
勗者盡矣余又何以贅焉第竊念余嘗讀栗谷先生
經筵日記知德溪諱健之有遂學又讀吾先子所撰
竹林廟庭碑知松菴諱斗煥之爲望士甚恨無以考
其系曲而又未知後承之爲誰今吳生卽松菴之裔
而德溪又是譜中人矣余不覺驚喜取而詳閱若杜
菴思湖沙湖歸休亭雲潭諸公其卓節至行皆足以
起歛於千載之下而吳門之賢不但德溪而已於不
休哉但松菴公以杜菴後孫嘗出入講質於吾先子
之門而遭回祿實蹟無傳云殊可歎也若歸休公之

不獲與於莊陵門外之壇又可慨也吳氏著自勝國爲簪纓巨族惜乎中葉以來累世不振然有是尊祖收族之勤而又知所以致勉者則庶乎其復見昌大矣余以老病久廢筆研而吳生之請甚力遂略書所感于心者以歸之

魯溪李公菱遺稿序

嗚呼此魯溪李公所著詩疏及書雜著若干杏也宣廟壬辰倭寇搶攘之時公以草茅一上舍生排闥闔呈琅玕條陳軍國之庶務敵愾之良策若改貢物裕民力通庶孽進人才等說罔非濟時之權宜鑿夫

甲乙之間進近思於講院敦勉諭教之義憫學校之
頹廢請寘訓導之任傷時憂國血忱斷斷噫使公處
乎夙夜之列立于臺閣之上則其所以訏謨猷爲者
奚但止於是而已方有登庸之命而橫罹竄謫之
苦晚沾一命亦復蹭蹬竟未得展其所蘊甚可惜也
今去公二百餘年風韻已邈而觀於柳西坳根金南
窓玄成諸公挽誄諸作有可以想得於其交際之間
者矣至若詩文格力之高下余實昧陋顧何敢妄議
公之後孫魯洙魯益袖示余要一言弁卷余辭以老
病且無文不獲遂書此以歸之

晚默堂集序

世之以集名家者多或數十冊少亦不下三四冊其
卷帙裒如其文彩燁如夷考其實則人或不如其文
而
其言非誇則贅耳若晚默堂李公遺集詩若干祭
文若干四六及科體若干大都不過一草沓亦甚寂
寥耳然而考其世則公私淑於寒岡鄭先生學有淵
源事親極其愛敬處兄弟盡其友恭屈首塲屋將以
悅親而及其不洎脫然舍去臨溪卜築扁以晚默講
究義理之書以終餘年吾夫子嘗曰仁者其言也詡
薛文清亦云千言萬當不如一默公之以是而扁齋

者其非有意於古之躬行君子而深懲於季世枝葉之煩乎吁亦可尚也已然是集也雖甚寥寥而曷可以少之哉公之後孫弼新請余置一言於卷端余以老病辭謝不獲而若公詩文之聲調格力非荒陋所敢評但誦讀詩書而不知其人鄒聖以為不可遂略論其世如此云

中和齋姜公事蹟序

孝子中和齋姜公

晉州人居恩津養親居密古

孝子之至行備於一身蓋其天稟過人而資於學者亦淺矣成廟朝命旌其閭而鄉之章甫立祠俎豆

之其實蹟載在三綱錄而見於南秋江師友錄及野
史地志諸書者又非一公後孫彝錫以其並取立祠
顛末合爲一冊予者來示余曰以吾先祖卓行而文
獻不足可以考證者惟此而已願得一言以爲重余
固非其人無文且病昏遂以是辭之姜君以大耄之
齡徒步再至以余方添病更畱後期而歸未幾而沒
其胤修涓曳衰來告曰請得文字然後可以葬我者
吾父臨終之言也余可得以終辭乎第念公之實行
已蒙褒典而三綱錄赫赫垂耀余雖有言贊而已矣
况秋江高節非苟爲毀譽者則傳信於後又豈可以

他求且遺事記聞有曰黃岡金先生疏請置墓直守
護又曰尤菴宋先生嘗言重建祠妥侑之宜夫如是
則百世之下可以知公者將不待考諸文字矣孰敢
更爲稱述者哉抑有一事可言者公之玄孫復中以
公蔭除寢郎篤行趾美遭不幸於至親所以處之不
失其常而終能感化叅奉之胤宗孝撫衣於沙溪金
先生之門而丙子虜亂與一二同志跋涉奔扈於南
漢圍城中根深末茂其理必然公之得於躬而垂於
後者焉可誣也惜乎今後承之孱微已甚而姜君之
息闡先徽到死靡懈亦可見遺韻之不沫也俯仰感

歎略書此于卷末以爲托名之榮焉

茂松庾氏族譜序

余嘗讀木川縣監庾公墓表於先文中惜其才器超
凡而位不稱德又歎庾氏實前朝大族而今頗不振
一日木川公後孫光澤檢來謂余曰吾族方修譜而
刊印幸賜一言以弁諸卷諸宗之願也余辭以無文
且病昏而其請甚力按庾氏皆祖於高麗太師忠節
公忠節佐太祖統合三韓而受封於平山自平山受
封移籍于茂松者曰太子少保安貞公自是累公累
卿孝友清白代不絕書而若侍郎公之危忠尤豈非

卓然者耶我朝受命侍郎公之裔曰賀以鄭圃隱
門徒不肯從仕謫于光州子孫遂爲南土人此又他
譜之所未聞也然則木川公及楸軒公秋峯公父子
其志節之偉然百載之下足令人起欽而其所自
來誠不可誣矣嗚呼達不達固有命而修不修惟在
己庾氏雖甚零替旣譜系而各知其來處矣苟能明
於內外之分而相與戒勗悖行孝悌思所以不沫前
徽則人孰敢少之而庶幾乎家聲之復振庾氏其勉
之哉余以固陋猥因序文之托得詳諸公實蹟又知
庾氏之於吾家誼分之深不但木川公一派而已則

爲幸大矣遂忘拙而略書此以謝其勤意焉

六後稷重修序

管城之六後稷創於崇禎戊戌而有寒水權先生及餒翁郭上舍題跋覽者可以詳其事實顛末矣嗚呼六斯文尊賢斥邪積忤凶黨終至竄謫荒裔而不少沮挫其勁正之操大爲吾先子文正公所獎與則後之人固無可以加述者而六家後承之修稷講好思所以不沫前徽者甚可同也惜乎其或不能繼世或不免移寓稷事之未講殆五十年矣歲丁丑呂氏後纘永自湖南撤還故里乃謀於郭上舍孫湜而重

附錄
卷之五
三十三
修之其述先貽後之意可謂善矣呂郭二君以余爲
文正後持示稷帖而要一言識其重修余雖病昏何
以辭爲所可致勉於六家後人者權先生篤信孜孜
之二云已盡之矣今何敢贅焉惟在同此帖者勉之之
如何耳遂書此以歸之

喚醒菴遺稿序

士有行訟學識見推重於鄉鄰自視欲然彌勤用力
於講究修飭而遽闕其年者故喚醒菴陳公克純字
粹然是已公羅州人世居南原生而氣稟溫粹長而
才識透悟既讀書不待師友指導而自知古人爲已

之方嘗曰小學工夫不可有一節之缺不可有一時
之闕其志尚之敦篤蓋如此而方在觀志兼治舉業
詞章之贍敏乃是餘事也公之後孫賢玉以公遺稿
一冊謁余爲序詩文合若干首而兼取功令各體八
九篇附以公行狀墓誌及挽誄等文字爲上下編者
也噫公不幸早世學未及充量而未有所著述則今
此零碎之篇其有無若無加損然其自省錄不惟可
以見公進德之實其所自言惻怛懇至有以警益於
後進者切矣其律絕諸作蓋亦少閒漫之詠雲仍之
欲剗刷以示後者不亦空乎余之荒拙誠不足以發

揮且欲論其世則邑誌詳其懿行士林爲之祭社而其顛末皆已編入於附錄余又何以贅焉陳君之請甚力遂強病書此以致欽尚之意焉

坡州牧使金公年譜序

故坡州牧使光山金公歿且二百有餘年其後孫濬澤以公年譜示余要一言以敘之噫公大家後承也黃岡先生爲其兄沙溪先生爲其姪則其世類之可尚有如此者及其筮仕雖以蔭途進而栗谷李先生薦拔於秉銓之日梧陰尹相公引補爲備局之郎則其才請之可觀有如此者其莅外任而當俗節見上

墓而省掃者不勝松楸之思不待瓜而徑歸則其篤
於追遠有如此者累典州郡聲績俱著而其沒也一
時名公之挽誄粲然成軸月沙李相公曰忠孝家聲
遠循良吏績多清陰金先生曰公道未應終泯沒待
看佳傳繼黃龔噫公之世遠矣無以論公之詳而古
語云見木知山觀於薦公與誄公者可以知公矣余
繙閱數回不覺歛衽老病因循而濬澤遽爲古人今
其從姪相普以其遺意來督之余爲之愴涕遂書之
如此

義士

贈文司憲李公

述原

實蹟序

嗚呼此義士 贈都憲李公實蹟也世之譚節義者
輒舉唐宗朕不識何狀之說深歎乎顏常山之能盡
分於疎遯然既分符守土與常山之死固其所也若
公賤下邑一寒儒耳雖使避鋒圖生無失於義乃以
討賊爲重不憚屈身於功曹而事急勢去爲賊所獲
則罵賊受刃視死如歸其凜凜烈烈視諸常山又何
如哉 朝家之懇勲褒錄所以樹風聲於永世以爲
臣子之勸而 筵教有曰以座首而其所辨節如此
所以歎賞之 聖意有可仰撝者而第其爲座首實
幽於知有國家而不知有其身者則似有所未盡濟

燭者豈不以自下陳聞失於致詳故耶公責地主之
逃躩而辭嚴義正令人髮豎觀於此足以知公之殺
身非曲於一朝之慷慨也公之男遇芳藁葬公而從
軍討賊終得手斬賊魁以復讎此實合於春秋之義
蓋其至性根天而得於觀感者又何可誣耶公仲叔
二兄及從子遇時遇白從姪遇秦再從弟鳳原栽原
亦皆從遇芳効力噫其盛矣氣義之萃一門始往牒
之所罕聞也公諸後孫取 賜祭文及筵說及公狀
誌諸篇建祠顛末編爲一冊子將以剞劂之曰有謙
勉秀先後來問序於余余無文且病昏不足以闡揚

萬一是編之行實有補世教遂不敢辭而謹書之如此云

四禮正變序

四禮是紀綱人道之始終而不可一日不講且習焉者也然而古今異宜常變殊用朱夫子嘗折衷損益著爲家禮而惜其書見失晚幽猶有遺憾伊後宋明諸儒暨我東先賢表章是書有註解有論說而然各自爲家無所統會學之者難於遍究行之者眩於適從連山金公景游典雅博洽遂於禮學類會諸家編爲一書名之曰四禮正變以家禮爲經附以本註而

古經及諸家之說可以考據發明者逐條備錄於本
註之下變禮之或無於家禮者別爲題目附於各條
之下行道之或高或低而本註附註之有分矣圈表
之或空或黑而華僑卓儒之有別矣儀文之詳約疑
義之曲折一開卷而瞭然若指掌好禮之家精究是
書則於吉凶常變之際庶不昧於所從矣書凡十冊
公之孫衡魯將付剞劂問序於余竊念沙溪老先生
實爲我東禮家之宗主而所著輯覽問解等書發揮
家禮之義嘉惠後學其功大矣公以其宗黨而生於
其鄉則豈非有得於先生之緒餘者耶第是書發凡

立例一遵文公之舊而該括諸家精密詳博非但一家中衍之寶也其行乎世無疑矣余甚病昏末由得一緝閱而究其旨義是可恨也其何敢爲序不忍孤金君慇懃之意遂略書之如此

全州李氏族譜序

國朝讓寧孝寧二大君世所謂東方之秦伯虞仲其後裔在諸宗爲最蕃報施之理豈不然乎孝寧之後宗判諱韶一派居于湖右之恩津蓋以宗判公墓在縣之鳳凰山故也孝寧子孫舊有譜爲十五卷則其麗之不億可知而譜後已爲五十年世益遠矣恩津

族修其派譜將刊印蓋幽於歐陽氏所謂各有高玄
再而成九而以族刪集則亦當復有會通之時之意
也苟非收族敦宗之勤且厚何以如是終始致力於
是役者叅判公九代孫鎮萬鎮容鎮容來問序於余
嗚呼孝寧之德尚矣無論叅判公之清名直節又豈
是待人言而顯者哉且余拙於文辭無以發揮遂以
是辭之而其請益力略書此以歸之

萬頃盧氏族譜序

壬辰之難重峯趙先生殉節于錦山從而死者有七
百義士余每讀尹月汀所撰殉義碑竊歎余之固陋

於其姓名之著于碑者又多未聞後承之爲誰一日
公州士人盧君炳奎修其族譜謁余爲序取考其譜
牒有諱應暉卽碑中之一也余不覺爲之蹶然而
歛衽而其兄知樞應暉弟直長應皓亦皆從先生倡
義雖其生死不同而其義則有不阿以殊觀者矣嗚
呼義烈之萃于一家何其甚盛雖曰秉彝之得於天
而其伯仲是受業於先生之人則熊魚之取舍豈非
其素所諱明者然耶自是以後遇難扈 駕而澤雷
鄉邑從事儒門而名重士友者譜不絕書其所以傳
於家者又可知矣蓋盧氏來自中國其受籍於萬頃

者高麗豐川伯諱坵之後牧使諱革而入我朝世
不甚顯然苟知內外輕重之分者閱斯譜寧或以是
而少之哉凡譜於是者既知來處矣又能考蹟而感
奮思所以無忝則卽張子所謂大有益於朝廷者而
歐陽氏所以書于譜者不必爲盧氏勉之也余實無
文以向所感慨於殉義碑者則亦不宐終辭於盧君
之請遂略書之如此云

恩津世稿序

嗚呼此長洲雲岳四佳窩三世合稿也長洲公於吾
先子文正公爲堂叔父先子序其詩集曰一變可知

全鼎而詩亦不如其人斯可以知公矣若雲岳之送
燕行諸作慨然有風泉之思而警世文齊戒說深有
意於過人欲而肅身心尤可欽尚况四佳公之窩說
非徒取植物中孤直芳潔者而編末擴充其四端服
膺乎四勿等語足令觀者有所警省而興起奚但公
後承之所可佩服從事者也有是哉雲岳公之不替
長洲風韻而四佳公之克紹雲岳徽範也三世遺稿
掇拾於斷爛燉逸皆鮮少無事於各編宜其合爲一
編而名以世稿也第詩什之聲病格律余素昧昧茲
不復贅焉

栗翁遺稿序

余嘗得忍背 神宗皇帝德何顏 宣祖大王靈之

詩於誦傳而未知作者之爲誰每風詠感慨不勝固陋之歎一日湖南士人宋以新爚與其族人之僑居永同者在一來訪以其先祖栗翁遺稿求爲之序而是詩在其中矣余不覺驚喜疾讀而卒業蓋其全稿入於回祿收拾散逸者只程文若干篇及五七律絕十餘首而已吁可惜矣然此一詩已入人肝脾而不但爲一羽之可以知全鳳則又何必多之爲貴也公新平人諱徵字信之性忠孝慷慨尚氣節所從遊皆

一時賢俊若松江鄭文清公屈年輩與之交歡焉當
壬辰難公歎曰母在不得以身殉國奉母避兵于山
中不免露宿風餐而能使母夫人忘其在難中昏朝
廢 母議起公以太學生疏斥爾瞻輩悖倫不道而
卽日徒步還鄉 仁廟甲子聞迺變奮然起曰吾今
乃可以死於國約同志募義旅將以勤 王適聞賊
平遂罷還以軍需納完府旣而復遊太學丙子請斬
虜使及丁丑天地翻覆則曰尚可以求進取乎遂題
是詩于鐘樓而歸而其述懷除日等作又皆是詩之
意也噫考觀公平生其所養之厚有可知者是詩也

夫豈其激發於一時者哉公又嘗爲松江遭讒上疏
訟冤伸救晴沙高公用厚被誣繫獄其訟松江也停
舉者十年而不悔蓋於義所當爲直前無所撓奪故
遜齋朴公光一以銀山鐵壁稱之斯足以信於來後
矣嗚呼余之荒拙固不足以序公詩文而詩文格力
之高下又豈是屑屑爲公言之者惟是鍾樓之題旣
知出於公手而復讀家狀於附錄得以詳公之徽蹟
則實爲余之所深幸遂略書此于卷端以致欽尚之
意焉

剛齋先生集卷之五

剛齋先生集卷之六目錄

記

盤谷書社記

清塵堂重建記

安東金氏旌閭重建記

沃川郡滄洲書院重修記

燕歧縣鳳巖書院入德齋重建記

采薇亭重修記

寶山精舍重修記

忠莊公禹

尚中

雙旌閭記

孝子羅公旌閭記

農學堂記

跋

菊堂遺稿跋

道統千字跋

書儒人清風金氏行狀後

松齋集跋

復姓安東金氏族譜跋

書忠毅金公

文起

遺事後

息齋寶記跋

書少尹趙公事蹟後

四事堂李公家所藏九菴簡牘帖跋

書孺人全氏家狀後

書全州崔氏先世誌狀後

斗南朴公所受師門簡牘跋

書朴氏世蹟後

書宋氏家藏岳武穆精忠錄後

書雲谷朴公遺事後

書權護軍所受尤翁大字帖後

書語孟字義辨後

書礪溪松巖二韓公實蹟後

尚志崔公遺事跋

木瓜翁實蹟跋

眉谷朴公遺事跋

五倫事實帖跋

書菊圃趙公行錄後

書玉村世稿後

書道谷趙公行錄後

靜一堂集跋

書學生梁公行狀後

書晉州姜氏世稿後

活溪集跋

書忠壯公諸將軍家乘後

書全生錫正所藏九菴筆蹟後

書副摠管邊公實蹟後

雜著

百千齋說

循齋說

申相拓名字說

栗圃精舍說

讀書說

一 墨贈琴家二童子說

勤謹一字說贈族孫翊洙兄弟

剛齋先生集卷之六

記

盤谷書社記

昔我先祖尤菴文正公門下有梅隱堂許公璜瑩叔
居于陽城之白雲山下盤谷里既沒八十有餘年邑
之章甫惜其芳躅蕪沒合力鳩材構屋數架於其講
亭遺址爲講學肄業之所名曰書社以寓景慕之意
苟非公所存之實何以使人興感於久遠而其置社
會講思有以闡揚前輩徽蹟亦可見諸章甫所尚之
正也公性質溫雅篤於孝友幼而聰悟文藝夙就既

永感遂廢舉業專意於爲己之學往來師門不憚徒
步文正公嘉愛其志尚之篤見解之精手書志伊尹
學顏淵六字以勉之其進省於謫所也與之講心經
而告之以直字心法又以海東一士雄之句送其歸
大賢之門得此期許之重夫豈偶然哉公爲近師門
搬寓於溫陽之梅谷自號梅隱先生爲之記楚山禍
後撤歸故里杜門屏跡溫理經籍每於和煦率後生
講習於門外槐樹下此卽人之指爲講亭者雖變化
後不變所守以終其身公貞靜之操殆晦翁所謂得
于天而成于學者而宜爲鄉黨之所欽誦不衰也嗚

呼世之談公者必舉所謂木儒尼通事蓋公與尹拯
有十餘年同門之誼其以江都倅奴豈合享祀之說
傳告于先生實有所不韙於木儒者而先生亦以惡
習斥之拯也反欲掩諱本事而歸先生於造言之科
則其徒投疏誣詆謂公無其人矣公不勝痛惋遺其
于擊鼓對辨終使 聖主洞察其情狀此雖所關不
細亦可以見公事一之誠顧非公平生大致則以是
而知公者豈不爲淺之爲知也公之玄孫諗以余爲
師門之後來致諸章甫之意而請記之甚勤余以不
文辭不獲遂略敘其立社顛末而並書所感于心者

以告來遊於社者焉

清塵堂重建記

清州之清塵堂胡西兵馬營治務之所也堂之創在英宗戊申討亂後故以是名之云歲甲戌冬節度使趙侯華錫來莅任去戊申爲八十餘年時連值大歉流丐盈路侯屢爲糜粥以饋之旣又以堂之頽廢將重新之或有以擾飢民爲言者侯曰宋之諸賢多以荒歲而興役矣余雖力量才局不及古人固欲惠之非敢擾之也乃捐俸鳩材以翌年某月始役重其價役夫全集閱幾朔而工告訖民之將四方者多賴而

存活而堂之間架制度視舊稍加有足以新耳目而
重威容焉噫朱子編小學書而館傳必增飾柳氏家
法見紀於善行矣然則侯之斯役已非後世橫目自
營者所暇及而不可無述况侯之意不但爲館傳之
飾而已者耶凡爲闔帥者以民事之非其所職視民
捐瘠殆若秦越者比比若侯者其用心可謂仁矣侯
能由是而擴充之則管下軍民必皆有親上死長之
心雖或有意外之警其塵有不足清者而庶不負
朝廷寄重鎮之意也侯其勉之哉侯以書來曰本營
樓觀記文皆是文正老先生手澤敢以繼述爲請顧

附錄
卷之六
余不肖無文無以承侯之美意而亦有所不敢辭者
遂略識之如此云

安東金氏旌閭重建記

余嘗爲學堂金公忘其蕪拙於遺墟碑其後孫光淳
遣其從弟樂淳復以兩世孝閭重建記爲請卽學堂
公長男大憲益精五代孫處士師俊也二公至行俱
載於邑誌而若處士公之冰池曲蓮孟宗雪筍豈得
專美於古耶忠義之家乃復有此百載之下令人起
欽而眞所謂是父是子矣噫忠孝之旌其閭不但褒
其人所以勵俗而勸後也然則凡棹楔之毀壞不修

在他人猶足爲之嗟惜况爲其雲仍者耶二公之間
屢經兵燹大憲公則遺址亦無徵矣光淳甫畫然興
歎與諸宗人竭力經營以今 上庚辰構得二間而
並揭二榜縣之西十里而距處士公遺址爲一喚地
路於是者必爲之式焉二公其有曰余有後昆而亦
豈不爲風教之一助也哉

沃川郡滄洲書院重修記

書院創建殆二百年矣未知其間幾經重修而院中
財力自來不贍則凡有工役所以措置者豈不艱辛
乎不以艱辛而廢所當爲爲之劈劃而亦不失宜惟

剛齋集卷之六
余不肖無文無以承侯之美意而亦有所不敢辭者
遂略識之如此云

安東金氏旌閭重建記

余嘗爲學堂金公恣其蕪拙於遺墟碑其後孫光淳
遣其從弟樂淳復以兩世孝閭重建記爲請卽學堂
公長男大憲益精五代孫處士師俊也二公至行俱
載於邑誌而若處士公之冰池幽蓮孟宗雪筍豈得
專美於古耶忠義之家乃復有此百載之下令人起
欽而眞所謂是父是子矣噫忠孝之旌其閭不但褒
其人所以勵俗而勸後也然則凡棹楔之毀壞不修

在他人猶足爲之嗟惜况爲其雲仍者耶二公之間
屢經兵燹大憲公則遺址亦無徵矣光淳甫盡然興
歎與諸宗人竭力經營以今 上庚辰構得二間而
並揭二榜縣之西十里而距處士公遺址爲一喚地
路於是者必爲之式焉二公其旨曰余有後昆而亦
豈不爲風教之一助也哉

沃川郡滄洲書院重修記

書院勅建殆二百年矣未知其間幾經重修而院中
財力自來不贍則凡有工役所以措置者豈不艱辛
乎不以艱辛而廢所當爲爲之劈劃而亦不失宏惟

在宥司之得其人而已歲丁丑以院屋皆老擇能幹者任其事多士薦全君孝曾琴君舜孝爲別任琴若嘗任本齋取羨餘置別庫斂散以待有事者有年而至是請搢紳有司于永同元侯錫玄復得贍學錢一百且收儒錢若干才鳩聚材瓦全琴二君俱遭艱遂自本齋主其事役未半而財先匱一鄉士林舉懷憂慨而荏苒數歲無以經紀二君旣免喪余以與聞院事復使勸起而李侯有秀方莅任以近院市廛一月所收歸之院二君遂以藉手而殫心完役堂序門廡一新於數月之內時辛巳秋也嗚呼世降俗渝宰郡

縣者鮮有留意於興學任學宮者罕見盡心於整務
是以不但講誦之無聞亦難棟宇之繕完今以斯院
之綿力而能了此大役二君之誠勤殊可嘉歎而苟
非元李二侯爲之周旋二君者又何以致其力哉書
其事而揭諸壁以爲後人勸所不可已余以病昏因
循至今而全君遽作泉下人其傷盡爲如何哉茲綴
數行以副齋儒之懇而適聞今閔侯捐俸分俵於校
院使備書籍而屬之本院者爲三十緡復有如全琴
二君者實心扛斲終不負侯之美意則豈不爲多士
之幸也耶侯名元鏞其爲政可謂知先務矣遂並記

之如此云

燕歧縣鳳巖書院入德齋重建記

書院之創舊矣百餘年之間院之屋宇未知幾經重修而世級漸降士風不振爲邑宰者鮮務興學之政任院事者難得能幹之人且院之事力自來凋殘是以凡有工役每患難成歲某甲是齋也以有顛覆之慮見毀而生財沒策末由改作士論紛然逸年未定今金侯上官幾日來謁院祠問院中諸節而曰是吾責也遂捐俸經紀不以事專委於院置看役吏督成而是夏有淫霖祠宇牆垣多見崩頽水齧仁智堂柱

礎有傾陷者而棟宇將不免撓圯侯聞之大驚亟招
工支柱而完其礎如舊仍補葺其浮椽風板之朽落
者修改其塗墍丹雘之傷汙者旬月之間並牆垣一
新之復增置保奴十名以敘院力院之章甫與之相
慶而歎曰不遇我侯院幾無以爲院嗚呼此其實際
語侯之爲政非所謂知先務者耶院任之爲侯所知
而終始其事者洪君一泳也來謂余曰我侯實蹟不
可不揭示而亦當爲後來者勸願得數行語余遂不
以蕪拙辭而略書之如此侯名箕明文元公先生後
孫而克守家法者也

采薇亭重修記

嗚呼薇蕨植物中一凡草也惟夷齊采之故流芳於萬世今夫亭之以是名而又不忍其荒廢者夫豈無其義歟亭在西山書院講堂之東幾步院之建在

肅廟癸未而亭亦同時所創也院以亭 端廟生六

臣漁溪趙先生卽其一而院與亭皆先生杖屨之墟也直亭之東有山雙峯特立干霄其名伯夷者古矣

當 端廟乙亥先生浩然南歸終老於斯以泯其迹

嘗九日登高賦詩言志音韻悲壯與墨胎氏采其之辭同一腔調嗚呼山之得名造物者之意若有待焉

而詠懷之作今古一轍又况雷首之一種春根亦在
於茲山者耶此後人之所以因其地而懷其人懷其
人而翔斯亭也亭之東有臺曰清風臺之北有巖曰
叩馬亦因是亭而次第寓名者也亭既久頽剝院之
章甫因舊而重新之先生後孫滄因謁記於余余惟
六先生清風峻節非老筆之所可揄揚而抑前記之
述已備矣復何庸贅焉遂朗吟忽焉歿我安歸之辭
亂以懷佳人不能忘之章而書此以歸之百世之下
登乎斯亭者庶幾聞風而有所興起焉爾

寶山精舍重修記

余嘗序草洞八賢行錄已聞寶山有精舍蓋當嘉
靖萬曆間運際休明一洞之內名勝輩出或立揚於
朝著或藏修於邱園風流德業不惟矜式於一時亦
足垂範於來世嘗占形勝置精舍以爲講討遊息之
所卽寶山也每良辰勝日杖屨後先勸業規尖傲藍
田之鄉約反躬務實遵滄州之諭學洞風於是乎彬
蔚而精舍亦得以聞乎世洞之後輩遵守補葺久而
罔墜間以祭社之禮建祠於精舍之後妥仿八賢則
事面增重而規制有未備者歲辛卯春洞之諸長老
合謀經紀仍舊址而新其屋置室於東西以爲齊宿

之所凡六架十六楹首尾五箇月而功告訖爽塏寬
敞溪山增顏張君幼章洞中人也來問記於余余惟
名園別榭雖擅一時之勝歎保百年之久惟此精舍
非徒保守無恙而已而春秋之講信冬夏之課學永
久無廢固可驗前輩之立規根基深厚而亦豈非後
人之紹述致其誠勤也是固可尚而可書若其四時
之異景朝暮之殊候登覽者自當得之而不能一快
心目是余之所架恨也是爲記

忠莊公禹

尚中

雙旌閣記

仁祖甲子逆逆以西帥舉兵犯闕

大駕倉卒南幸

公以宣傳官護從至漢江天寒流澌舟在南岸而梢
工輩觀勢逗遛招招不應公請往斬篙師提船而來
上曰爾雖有貫日之忠絕人之力柰難徒涉何對曰
主辱臣死乃分之宜臣敢愛死乎遂脫衣袴手長劍
或潛或浮而渡梢工舉楫迎擊公奮呼登船斬其二
人叱令回泊既復命 上見其皮膚受傷血流手裂
袞袍而裹之教曰今日之事予不可忘遂從間道到
全義地背負 上躬踰嶺上曰爾其無勞乎且暫憩
解渴公手掘石間水湧出先以進御 上飲而甘之
後人號其水曰殿下泉云既而适兵敗伏誅自公州

回鑾 上顧謂左右曰禹尚中貫日之忠危身之功
將何以褒賞及到漢江 上顧謂公曰此非若效死
之地乎還宮又命名語之曰予有今日爾之力也及
後丁卯虜變公方居父喪欲赴難哭辭靈几入訣母
夫人母夫人許之曰汝既許國國危如此毋以老母
爲念也公且泣且行到錦營道伯以聞 上命起復
爲守禦大將領本州兵防禦雙樹山城俄而虜請和
乃辭歸廬次丙子虜再入公以全州營將與道伯李
公時昉領兵直向廣州遇賊力戰不利將約日復舉
聞南漢和成北望痛哭如不欲生公自幼有至性年

十八母夫人患毒腫甚危公虔誠祝天願以身代將
訪醫于隔水地會天大雨津路不通行到水邊扣腦
仰天曰母病垂死予豈愛身冒死欲渡漲流忽淺遂
抵醫家丐治母病醫感而許之公背負而渡纔渡水
復漲流醫歎其誠孝之感天及試鍼藥果得神效其
遭外艱毀幾滅性居廬終制自少時着母夫人襦衣
雖宦遊從軍之日未嘗暫脫及喪每手撫血泣未及
免喪而沒卽 孝廟壬辰也嗚呼公之孝既如斯則
所以移以事君者宜其卓偉而孝門求忠之古訓豈
不信然乎計聞 上震悼命道臣厚庀其葬而甲午

又親製文致祭 景廟癸卯道臣因士林齊訴以
公忠孝實狀陳聞 上教曰禹尚中之忠與孝炳炳
卓卓贈兵曹判書 當宁庚午因大臣建白贈諡忠
莊 孝明代理戊子因儒生上言雙旌忠孝嗚呼
列聖朝恩褒至此而無餘憾矣七代孫昇茲極力經
紀建閣揭板以家狀謁余爲記余老病久廢筆研然
公之實蹟夙所飲聞而欽誦者遂不以辭而略書之
如此云

孝子羅公旌閭記

余嘗聞湖南之金堤郡有羅氏三世八孝而甚恨無

以得詳其實蹟一日羅君宜材袖示其先君永怡堂
 行錄一通而求為旌閭記永怡公即八孝家後承而
 亦以孝旌閭於 當宁戊子者也噫羅氏之門一何
 多孝也詩云孝子不置永錫爾類不其信矣乎公諱
 漢明字君倬五代祖建溪公諱安世以孝著八代祖
 龜山處士諱應參七代祖節孝公諱表俱以孝旌閭
 考諱綜亦以孝 贈教官公姿性溫和才行兼備成
 童遭母喪哀毀逾禮後遭繼母喪亦如之奉養教官
 公志物備至病而嘗糞瘡而吮毒及其惟幾血指延
 一日之命初喪哀毀幾滅性葬之日天大雨四方獨

葬所不雨人莫不異之豈非孝感所致耶葬後仍廬
于墓側朝夕哀省雨雪不廢去家十餘里日必往來
哭八筵血氣旣衰而執禮愈篤其不至於不勝喪人
皆謂神明之所扶持也嘗赴舉夜行遇暴客不惟不
見劫乃爲之護送曰此是羅孝子云公餘力學文潛
究經史杜門守靜樂於爲善居家接人無非孝之推
也道剡登 聞先復後旌噫公以孝子之孫孝子之
子而其孝又如卓卓真可謂不忝所生矣世之爲
人子者聞其風可以知所勸况爲公之子孫者耶羅
氏之以孝相傳可以期於無窮也余固無文且病昏

國朝文獻通考卷之六十一
十一
猶竊樂夫道人之善矧乎公之世孝乎因以得八孝
之所以爲孝尤爲固陋之幸於是乎記

農學堂記

先王之世民有四勇士農異趣時則經界正仁政行
爲士者讀書求志而不患無所養矣降及季世王政
已遠民生已困士但匡坐讀書而已則事有沒策未
食亂心亦難乎爲士矣礪山宋君榮載讀書行誼士
也少工舉業晚暮無成老耽經籍家事旁落乃卜築
於華山之芝谷且耕且讀而爲貽後計於子姓中觀
其才器趣向分授其業以爲相資互修之地其垂成

也深且遠矣性潭宋先生聞而嘉之書贈農學二字
以扁其齋君之後承服詩禮勤菑畚以繼志述事且
肯構其堂而新之問記於余余固知帶經而鋤朝耕
夜讀古人已然爲今之士固難偏廢也爲君子孫者
苟能力穡而善修身則人固不敢侮而天且不能竊
矣然於二者不可無輕重之別須信吾夫子耕也餒
在之訓而尤當致力於寡尤寡悔之道矣遂書此歸
之俾揭于壁

跋

菊堂遺稿跋

菊堂朴公早業文藝妙齡中司馬兩試復屢占大科
解額而一時儕友皆推之以大手矣其著述之富有
固有可知者今十餘世累經兵火僅得亂草一沓雷
傳箱篋詩文合若干首而故紙殘缺殆不能讀公後
孫禧錫來謂余曰吾先祖遺蹟只此而已其傳與不
傳於先祖固無所加損而在後孫之心不忍任其滅
沒於百年葆守之餘將以活字印之附錄行狀墓文
分之於內外裔之知其可貴者而不可無識願賜一
言以徵諸後噫公不但英敏見稱於師門亦爲牧老
之所深許可以知公者果不在此零碎之篇然詩文

之出於公者此外無他則此實全鼎之一巒安乎朴
君用心之勤而非追先之孝有過人者何以如是朴
君之言又曰存拔非所可論若校讎之不得其精吾
實負罪而俟後人於他日余亦公之彌甥也嘉其誠
而感其意遂書此于卷後以歸之

道統千字跋

凡童子始受教必先周興嗣千字文舉世皆然蓋爲
其字不疊而文亦可取也李上舍任道嫌其文少且
謂雖幼少者亦當使之知有聖賢道統乃取千字外
之千字上自羲軒下至程朱略敘其蹟名之曰道統

千字使讀千字者繼又讀此其意可謂勤且善矣豈
非晦翁所謂足以養正於蒙者耶任道補示之謂將
鏤板略書此于其下方以相勗焉

書孺人清風金氏行狀後

故孺人清風金氏夢梧相公之女徐君耆輔其所後
胤也頃年徐君嘗訪余其重厚謹飭一見可知有操
執蓋其得於慈教者然也嗚呼徐君今不可見而其
弟忠輔夏卿袖示君所爲孺人狀要櫟栝以爲定本
其辭質而不華宛轉委曲皆可以信於後矣但考徵
於孺人懿德之始終亦可見君之所以爲子者矣蓋

夢梧家法爲搢紳家楷範孺人之孺染固有素而自
喪所天其志行之卓絕尤有叔季之所罕聞至於夢
梧公之見追奪不樂京居而其言有令人起欷者古
所謂女士者倘非孺人之謂耶嗚呼余早孤人也今
讀此狀其冬不求溫夏不就涼坐寢皆有常處足武
不及堂廡不與人羣居諠笑雖親戚未嘗與之款洽
皆余所嘗見之於吾母者自不覺爲之下淚顧何敢
辭夏卿之托不惟文拙病在死域實有強不得者况
其孝子之所述有不必待余言者耶遂略書于卷末
如此云

松齋集跋

嗚呼人情莫不知剛直之爲貴氣節之可尚然非讀書窮理取舍之分素明於心則雖平日之稍自激昂者禍福之所怵誘鮮有能全其所守者矣若松齋先生羅公其重試對策大忤權奸重被構陷詔獄桁楊之酷邊遠荐棘之苦苟非燭幽之聖德幾不保性命而及再登朝剛大之氣不以少挫當乙巳羣凶勢焰熏天之日從違之間死生立判而力辭錄勳疏爭廟議惟義所在無所避忌勁操凜然千載之下足令人聞風起敬而其免於禍則天也惜乎其疏本之見

逸也是豈出於一時之慷慨激發者哉今讀其遺文
其所養之厚槩可想見而退溪河西諸先生與之相
善者蓋有以焉宐其所立之卓偉如是也公之文集
將刊後孫學弼來示余求爲之跋旣有性潭先生序
文且以行狀墓表挽誄等文字編爲附錄則公之徽
蹟始終略備而諸賢所以稱揚之者殆無遺憾矣復
何待於余言余旣辭不獲遂略推序文餘意如此斯
集之行豈不使怯懦者有所勃然奮勵也哉編摩校
讎之役終始致力者河西後孫金章煥及公之九世
孫大弼云

復姓安東金氏族譜跋

金氏既復姓修譜牒謁序文於清陰後孫尚書金公
復屬余爲跋顧序文詳書變姓復姓顛末而欽歎乎
侍中公之高義嘉尚乎諸後承之誠意仍及他日同
譜之意而改名謁文者命哲爲乃鎮俾從行於自家
諸少意勤而事備固可以垂後矣寧容復贅他說竊
念公生於小國不免奉皮幣於事大而彼乃班乎游
雪諸夷之間則自以箕聖衣冠遺民不肯受汗雖見
觸忤而不少挫非見義明而不知有死生禍福者能
如是耶夫以千乘之國嘉其守義不辱命而欲全之

所以處之豈無其道而至使之變姓則麗王之畏約可謂甚矣然姓之以秦而曰外雖變文內實存舊則復姓之意已寓於變姓之中而蹉跎荏奄至累百年不有 聖朝俯聽孱孫終何以雪其幽憤耶嗚呼屈伸固有時而其得伸於神州再見陸沉之日亦似有不偶然者矣余實爲之感慨恐陋拙而略書之如此云

書忠毅金公

文起

遺事後

嗚呼公之死與六臣同其節而其服不服不同公之不服必有主意而非後人所可忖度者然若以是疑

其凶於畏死而差殊看於六臣則是不識當時事勢者何足與論於公之大節也哉至於 褒獎之典初非公之所念及而無所損益於成仁則其早晚之不同於六臣顧何恨也惟其終與六臣同配食於 莊陵門外之壇者不遇我 聖考特達之知其可得乎公若有知亦必感泣於冥冥之中也公之後孫致鉉以公事實來示余濯手玩釋不勝感慨遂略書此以歸之

恩齊實記跋

嗚呼今去己卯士禍餘二百年而譚之者爲之傷盡

如隔晨然知其爲己卯名流則不待考其實蹟而莫
不賢之豈不以靜菴趙先生實道學大儒而爲領袖
故耶思齊先生安公處順從遊於靜菴者也乞養爲
求禮縣監己卯訪靜菴及自菴金公于謫所旣而棄
官大爲羣小所愠其免于禍特幸耳一日其後孫思
訥以思齊實記來示余曰編成者吾族祖也考訂者
漢湖金公也序之者廣巖朴公也鳩財募工並諸賢
手筆而劖刷之者吾祖也力綿未克印出藏板于先
祖書院藏之未得其善板多腐朽刑缺而獨手筆最
完若有神扶者吾大懼吾祖爲先之誠毀于旣成使

後之人無所考於吾先祖徽蹟遂謀于諸族及院儒
而拮据財力將改腐朽之板而印行之不可無跋語
敢以爲請余敬受而讀之殊不勝固陋之幸於己卯
名流而復得詳其本末則所以起欽者爲如何哉竊
念序文之引重而發揮之者已無餘蘊以余荒拙復
何敢贅一辭第嘉安君緒述之美亦以托名爲榮略
書此以歸之

書少尹趙公事蹟後

掃廟遜位大臣死之而司僕寺少尹趙公清老與子
英緒同其節焉公高麗忠臣松山諱翁之孫也靈芝

醴泉豈可曰無根源哉噫世莫不知六臣之爲六臣
而一時同死諸人則多不能詳豈不以謀復 上王
大臣者爲之主耶以其主事則其人固有彼此論其
舍生則其義實無異同公又子姓名俱載於鶴寺招
魂記而年代寔遠實蹟幾晦 正宗辛亥特命從祀
於 莊陵門外之壇然後乃與六臣齊光並耀而闡
揚無憾足以爲百世勸 大聖人所作爲幽尋常萬
萬而九地之下公亦豈不感泣耶今 上辛未又命
旋闈則朝家令典殆無不舉而士林猶以爵諡之請
未獲登微爲恨尊尚之人心有可見者而顧於公何

所加損獨惜其家乘無傳無以考其平生然既不忝
祖武而匹休於六臣蒙 聖朝恩褒於累百年之後
則其他亦有不必要詳者矣公後孫將以殉節事實及
褒典首末來示之仍求一言奉閱再三不勝感慨輒
忘其蕪拙而謹書之如此云

四事堂李公家所藏九菴簡牘帖跋

嗚呼此吾先祖父文正公與四事堂李公往復手筆也
先子於公非但聯袂之義重以遊從之好寒暄存訊
源源相續雖尋常掌蹠可見情素之藹然而及夫北
謫南遷瀛海間關之際則平生知舊之自謂親厚者

舉皆趙趙懾惻鮮不靳一字之間而惟公眷眷情訊
有加於平時吾先子亦酬答不倦前後累紙若是鄭
重於此非徒可以知兩家之事契而亦可想先輩風
誼之篤矣公之後承不遺隻字收拾粧貼因成巨篇
以爲傳家之寶藏公之六代孫學修甫袖以示余曰
間嘗奉請跋語於性潭先生矣諾而未果此子之責
也余敬玩摩挲不勝桑梓之感噫吾先子遺墨在今
後學孰不敬慕而况爲其子孫者耶於君之請固不
可以荒拙辭而老病因循已有年矣今又送其胤以
書見督甚勤余今隔死如紙終無一言則不但孤君

之勤意其於慕先之道豈不有歎也耶遂強病略書
于下方如此以歸之

書孺人全氏家狀後

坡平尹光演早孤而能有志於學嘗自漢師徒步訪
余而曰使從賢師友慈教也余之淺陋實無可及人
者則於尹君之言甚有愧焉而教以義方浚服其母
儀之賢歲已巳尹君遭艱及葬仵人告期余遂爲之
挽矣翌年冬尹君具家狀來泣請墓銘其涉獵書史
略通大義孝奉尊姑無違夫子善持家而喜施與益
知所未知尤不覺爲之欽歎顧余非不朽人者且拙

於文辭無以闡揚閨範之懿再三謝不敢只略書于
卷末如此尹君每誦程子一髭髮不似僂非其人之
語而歎記行之尤不可不審則今此敘述豈有所溢
美哉是宜爲銘之者之所知也

書全州崔氏先世誌狀後

余嘗聞麗末有晚六堂崔公養以圃隱鄭先生姊子
從學于先生濛蒙獎與先生死於國公卽日棄官南
下屏居于全州我朝受命名以相不膺及太祖
大王幸浴溫陽諭之以故舊之誼然後乃以布衣進
見而終不稱臣偉其人高其節顧無以詳其本末又

未知其後裔之見在何地則殊爲之慨恨一日崔生
達旻光岳自湖南之金溝來訪袖示其先世誌狀卽
晚六及其曾孫梅村湜梅村男愛日堂應參也余蹶
然而起歛衽而讀晚六公少先生十五歲先生不名
而字之曰年雖後我道則前我欲知公者宜觀於此
且盡心所事不避艱險奉使上國 天子優禮而畢
竟遜荒而罔僕又卓卓如彼與先生生死雖異忠節
實同猗歟休哉無以尚矣若梅村公名祖之孫篤孝
根天年未成童遭內外艱割指於病劇幸得少延盡
誠於送終能無憾悔而其閔制以後至于終身絲竹

不近於耳諧謔不曲於口則過人之行求之於古亦罕其倫愛日公趾美家庭能養雙親而其堂扁實幽澁誠蘇陽谷世讓既爲之記又以詩美之而一時名勝和次者亦三四人兩世俱蒙 朝家爵賞旌褒之典而梅村公狀稱其沉潛經傳講明義理實爲時人之宗師則其晚來所成就又不但孝而已嗚呼晚六公其肯曰余有後哉崔生求余爲跋余實無文而於晚六公景仰有素遂不敢終辭但年代已遠文獻無徵梅村父子褒旌之在於何時亦無以考證則又可得其事行之詳耶是可歎惜也已

斗南朴公所受師門簡牘跋

斗南朴公世經我先祖尤菴文正公門人也公之後
孫仁休齋公所得師門簡牘及大字數紙自湖南之
古阜來尋舊誼其意甚勤余延見敘寒暄訖盥手奉
閱其所齋者雖片言隻字間固有所感發人者而公
之爲人與其爲學因亦可以想得矣蓋因材而篤是
聖門教人之法而程朱以來諸賢每以躡等爲戒於
學者苟非公之篤志自修先生何以勉其精熟於心
經而仍有得力於此爲聖爲賢何所不可之云耶公
旣承此教則其所奮發尤當如何也且大字固有見

逸不能全者而惟安貧守志四字亦可見期許之不
草草矣此豈非後人之所不可不知者耶余方讀心
經而衰頹已甚無復精熟得力之望今玩繹此帖益
愧其虛度壯年也感歎之餘遂略書此而仍爲朴君
戒勗焉

書朴氏世蹟後

密陽朴氏爲東方大族而訥齋江叟父子最顯訥齋
公 中朝學士歎賞其文章江叟先生趙靜菴諸賢
推重其德行休巖公世美卽江叟五世孫也我先祖
允菴文正公稱爲江叟後一人而大書休巖精舍四

字以與之休巖之男北溪公守約師事尤菴同春二
先生尤菴曰某有是子同春則許以飭躬修行允迪
前徽兩世得此獎與於大賢之門者榮耀極矣而勉
翁致民及明源堂致濟又以北溪二子克趾其美孝
悌之行爲鄉黨所誦慕嗚呼偉哉視世之位極其顯
沒而無可稱者果何如耶休巖北溪我再從叔性潭
先生暨廣巖朴公銘其墓勉翁則澹洲申公狀其行
而明源之狀又性潭文也余與朴氏修世好講感證
固已稔知其世德之美而今讀銘與狀更得休巖以
來事親奉先敦宗睦族之詳則尤不覺自幸而重爲

之起敬矣明源公曾孫載實哀稔其實蹟而將劓劓
之屬余爲之跋余以陋拙辭不獲謹書之如此而載
實甫亦以居喪盡禮享先以誠見重於士友則厥緒
之綿延而昌大有不可涯涘也哉

書宋氏家藏岳武穆精忠錄後

此精忠錄 萬曆甲申 宣廟命芸閣刊印而牧使
宋公純禮以阿山萬戶受 賜者也本上下卷而惜
乎兵火之餘失其半矣公 端廟舊臣忠剛公諱侃
之玄孫而屢立戰功獲此 恩頒雖其世遠無以得
實蹟之詳其盡忠報國不沫前徽固有可知者矣按

公行錄自兒時以孝聞及居親喪一遵禮法晨昏哭
墓於數里餘不以寒暑風雨而或廢所謂求忠臣於
孝子之門者豈不信然乎且公之孫府使弘淵樹勳
於壬辰僉正弘賢倡義於丙子則公之爲忠可謂有
所來有所往而足以無愧於岳氏父子矣 明主之
賜夫豈偶然也哉公之後孫壽祿持示余而請識之
謹書之如此而更求板之所藏印得下一卷俾成完
本所不可已遂以相勉焉

書雲谷朴公遺事後

世之知有尚州朴氏者豈不以貞肅公剛直之節道

溪齋學行之懿耶若雲谷公講曾孫字太而以貞肅
之傍齋樞衣於道源之門而爲靜菴趙先生所稱賞
則不待考其實蹟而可以知其人矣噫公以世家子
弟早中司馬文行著稱而遭時不幸賢師有訓則不
復就公車及其師之沒于謫所遂屏跡遐鄉新居揭
以舊扁經史自娛忠孝設教終身無怨悔苟非所養
之厚所守之確何以如是惜乎文獻無徵無以詳其
爲學之本末以山名雲谷洞號自京之皆由於公則
時人之尊尚愛慕於公者固可想矣且公之孫主簿
大鵬嘗以進士叅 宣廟己丑丁巖壽疏壬辰倡義

勤 王錄原從勳雖其忠義根於秉彝家傳之有所
自亦不可誣矣公之後孫禎一從我遊一日持示公
遺事奉閱感慨之餘遂書此于後以謝其勤意焉

書權護軍所受尤翁大字帖後

安東吏權思度費示其所藏尤菴先生筆蹟卽其先
護軍後重所受十六大字而君子存心當如青天白
日之語也奉玩興感不忍釋手而仍可以想見護軍
之爲人矣護軍嘗陳己見於先生去就而爲先生所
稱揚先生書贈又以此十六字則其非求之士大夫
中而亦不易得者耶其後承護守至今而重新禱糴

思永其傳亦甚可尚若思度之父聖範聞其爲子而
孝爲吏而廉 朝家旌之鄉邑誦之可謂于祖有光
而護軍遺韻之及遠誠不可誣也爲之歎嗟遂並以
識之

書諸孟字義辨後

日本人伊藤維禎作語孟字義維禎蓋其國之業儒
學者而其說多譏評朱子者矣其書流到我國或有
取見而惑志者宣城李上舍遠重任道爲著說以辨
之夫朱子孔子後一人也日月所照凡有血氣者莫
不尊親而維禎乃有此妄作固可駭也然其臆說類

多差謬而曲於遠方蠻夷之手則其妄不須辨既有
取見而惑志者則在防微之道亦有不可愒然者此
任道之意也但其可辨只在於妄許朱子而已餘何
足費說也任道持尔余留之已久今將還之遂書此
于卷末以識之

書礪溪松巖二韓公實蹟後

清州韓氏木川族自礪溪公應箕松巖公應南兄弟
始居于縣東二十里之葛田至今八九世頗蕃衍焉
二公俱學于剡溪先生李公潛之門伯公得壁立千
仞大人氣像八字書贈季公見稱以德性渾厚學識

淹博可以知二公者其不在於斯耶壬辰倭亂伯公
聞乘輿播遷灑涕而起曰吾雖一介書生豈可安
坐於此時偏親在堂而奉養幸有吾弟遂杖劔西行
追及大駕於永柔上甚嘉之曰當此板蕩朝臣
有職責者亦多蒼黃逃竄汝以白衣奮不顧身千里
勤扈苟非一腔忠義詎能如是命除叅奉_{未幾}
公遽沒上悼惜之特給斂殯之具年僅四十三矣
季公以經學薦官至奉事伯氏西赴遂歸養親親沒
斂跡林泉教授後進寒岡鄭先生述歷訪公與之談
論而曰君子人矣微斯人吾誰與歸且愛其溪山清

絕結茅於松巖之北一喚地而相從講磨者有年我先祖尤菴文正公嘗與郭師傅始徵過礮溪有曰古人清標亦可想於山水之間而削成臺倒影巖之題刻至今宛然云公年七十三而終刻溪之胤西溪得胤銘其墓曰兄能盡忠弟常竭孝一門赫業百世可師嗚呼斯言豈非約而盡者耶公嘗營講舍於礮溪之南得一石鍾於開基時刻竹林二字公異之曰此晦翁精舍之號也獲此於今日誠非偶然因與一鄉章甫建朱子祠配以濯纓先生金公今之道東書院是也公爲院長實多啓發多士之功後追配鄭寒岡

及朽淺黃公宗海士論以不並舉公兄弟爲歉焉公
後孫奎采從我遊一日與其族大父五相三從兄奎
洛持示二公遺事而求爲碣文余久淹床席辭以未
能而其請甚力遂撮其略而名之曰實蹟然二公以
超凡之姿篤向道之志早有師門令譽而畢竟所成
就 聖主褒獎之卓名賢推許之重乃如彼則自可
不朽於千載之下矣顧余陋拙之言豈不爲贅而已
哉

尚志崔公遺事跋

扶安士人崔君觀錫久與相識余甚愛其詳雅而意

其有家庭訓飭一日與其仲季聯袂而至持示其先君遺事一通及遺稿一冊求爲之狀蓋崔氏全州人高麗門下侍郎平章事諡文成阿之後國初有講憲官集賢提學號月塘有厚德清福爲一時諸名勝所稱述焉至孫殿直生明始家于扶安今十餘世文行相傳公稟質清秀性度安詳早業功令自期甚不草草及一見屈於省試輒歎數奇且慨然於聲利之誘人遂不復應舉而扁其齋曰尚志守拙養靜教課子孫嘗曰士之立身揚名惟在於文學而科目成功命乃在天豈可以功之未成而廢其學也行有餘力

聖人之訓若科文卽餘事耳汝曹其勉之哉嗚呼此卽所謂以身教者而非明於內外輕重之分能如是乎自是好家門烟村先生講德之又其芻先則其有所受誠不可誣也余生並一世而相距落落未獲遊從於平日而叩其所存是爲可恨今於文字之托所不宐辭顧余久患風痰全失精神無以自力於筆硯之役只略書欽尚之意于遺事後以謝崔君昆弟其仲季名鼎錫謙錫而難兄難弟者於是乎益知前日所以意之者果不謬也

木瓜翁寶蹟跋

嗚呼此 贈掌隸院判度事朴公種實蹟也 宣廟

丁酉倭寇再逞所過殘酷甚於壬辰寇入扶餘公時

爲校任奮曰吾以儒爲名使聖廟位版污蟻於賊手

何以爲儒遂奔入校宮奉位版埋安潔地並收藏祭

器亂已還奉列邑之復設校者位版及祭器皆來取

式人謂公有衛聖之功焉公以下邑一校任能不顧

死生而盡分於所當爲蓋其資質過人而亦豈非養

之有素耶苟使當時之守官任職者皆如公之用心

則倭寇何足憂也安乎鄉鄰之欽誦久而不衰狀于

營邑以之上聞而 朝家之特加褒贈振發士氣又

甚卓絕其據實陳請者疎齋李公及玉吾齋宋公而
歌詩以銘公墓者巍巖先生李公也噫其盛矣可以
垂耀永世而後幾年有欲報爭訟之憾於公之後孫
者誣謂丁酉衛聖非公而乃張應起也終至收公

贈牒而移賞於張爲此者實向之盡心於闡顯公者
之後人世變誠有不可測者矣公諸後孫多年呈辨
於營邑末乃鳴金訴冤於 駕前始獲快伸更蒙刑
曹叅議之 贈事之終極必歸於正豈非理也今持
示余而願得一言者公七代孫基源余病裏繙閱不
覺斂衽遂略書此以歸之始公之入校宮也賊以劔

擊之受刃處結贅如木瓜故自號木瓜翁云

眉谷朴公遺事跋

昔吾先子允菴文正公書故寺正朴公諱承健之碣曰家行淳篤無愧古人世之有斯人豈非風教之所關耶余爲寺正公彌甥而稔聞朴氏家法之懿今得公曾孫眉谷公遺事而讀之益信其然矣公諱溥源以錫類之孝天稟尤篤自幼及長所以事父母者承順之節奉養之誠古孝子之行無一不備若割指割股於親瘠乃其疏節也平生喜讀聖賢書嘗曰讀盡好文字看盡名山水以終吾生爲至願其志尚之高

古又可見也而其憂慨乎甲辰 朝家之處分者未
豈是放情物外遺落世事者耶蓋其爲孝多得之於
讀書而不但稟賦之美而已矣惜乎天闕其年未得
究竟其志業也紫陽夫子嘗言若求知而爲之割股
廬墓亦爲人耳公之至行只自盡分則人之知不知
顧何損益於公而其扶樹世教有不可不揀揚而
褒顯嗚呼誰有能任此責者公之玄孫義鎮袖示余
強病一閱不覺起欽遂忘其蕪拙而謹書于卷後如
此

五倫事實帖跋

嗚呼此帖吾先子文正公題跋詳其顛末而極其發
揮矣復何以贅焉第流落於他人之手而本孫之不
知其有者實李氏之不幸也容齋公十代孫壽熙以
容齋墓祭事遍訪遠近諸宗往來之際偶得於人家
售其價而還取之事甚奇矣豈其慕先之誠有以感
於冥冥耶此帖雖使他人有之猶且愛翫而寶藏之
況在後承尤當如何壽熙甫以余爲文正公之後袖
示之而要一言余奉翫摩挲不覺起欽於先輩之篤
於人倫而善於裕後矣遂書此以勉其善守而永傳
不沫先徽於無窮也

書菊圃趙公行錄後

余嘗爲愛勤趙公記碑陰於居廬遺墟今其子榮教
又以其所生考菊圃公行錄來示曰願得一言以信
後公卽愛勤之季而難兄難弟者也有淳姿篤志從
遊於三山齋金公之門其所講質多蒙獎與而孝友
行義之卓絕又當求之於古人中矣嗚呼世級旣降
民鮮興行公之兄弟其實蹟甚爲鄉鄰之所愛慕欽
誦猗歟休哉若公其得之於學有不可誣者矣但稟
賦之邁倫而已也余固非不朽人者又不嫻於文辭
旣不得辭之於前茲復強病略書于卷後以致歎尚

之意焉

書玉村世稿後

李生涵刀筆族而志學修行者也余甚愛其拔出於
卑微一日持示其累世行蹟蓋其先慶州世家而居
于尚州寢郎三壽主簿睦其二十一兩世俱有學
行寸世曰起鍊請益于河師傅洛之門甚見愛重而
言議峻正爲黨人所深嫉有子曰景南慷慨有志節
事親以不及曾閔爲恥壬辰倭亂以忠義激勵鄉人
約爲敢死隊而從於通判權公吉通判之立殪也適
以運糧于山城而不得同其死及鄭統制起龍之爲

判官復率衆往屬焉則異趣之不相悅者謂不處於
權通判而請用軍律甚力鄭公名問之異其言貌減
死付吏使掌軍務故至今其後孫在鴈鷺行然觀於
其昏朝扶倫之疏丙子送子之言豈其貪生而失義
者耶自是世篤孝友而其爲孝也多得之於讀書明
理不但質美而暗合於古而已若嘉善時發晬日同
於異顏而及先沒母不忍受諸子稱觴則又可知其
子母而其平日不須問其如何矣且尊周一念炳炳
傳世 贈監正枝元 贈叅議根生其所行所處尤
爲卓然而非可以椽吏視者惜乎其未獲揀揚於任

世教之大筆也僉樞三億其陳說於南樓揭額宛轉
感慨有戚戚動人者亦可謂明於義而不忝祖也余
繙閱再三不覺歛衽而病昏文拙有不能盡書者莫
在官而忠勤廉潔顧何必屑屑言之其世既如此而
涵之父復運才行志操之超卓庶乎復其家而未弱
冠而沒可悲也已臨沒托父母之養於其婦其婦之
竭其誠力不負所托殆無異於陳孝婦故事州之人
士方狀于營邑而請褒顯嗚呼涵也其果有所受矣
思欲爲能子惟在加勉而已涵乎其盡心哉

書道谷趙公行錄後

道谷趙公益道忠孝古家之偉人早年登科壽逾七旬而官止於宣傳何其蹭蹬也豈非朱子所謂生於窮荒下邑既無以自振而又知自貴重不肖希世取寵遂以陸沉下僚不及究其所有者耶賊适之啓請爲幕僚蓋聞公之有膽略而及與同處知非振落者則乃淺憚之故令幹事遠邑而趨其未返舉兵犯闕大駕播遷于公州公聞變始覺其遠幽陷賊姦計痛憤欲死遂馳詣行在嚙指血訴情實而請罪仁廟大奇之公承命赴元帥張晚陣而討賊冒刃衝突以身先之曰當國家板蕩之際爲臣子者孰敢

不竭力惟吾誤雷賊幕見欺出外亂初未能手斬賊頭今不如此又何以報我 聖上矜察微情之恩嗚呼此非其秉心之貞能盡其忠義之性者耶平亂而定功行賞也 上教曰錄勲封爵一依等列而至於表忠豈可無特典臨亂一死易去就明白難向者趙某之嚙指無異岳王之涅背 賜以岳武穆精忠錄世遂稱公爲海東岳飛公乃以微末之官蒙此殊異之 褒則顧不可謂不遇矣公無復進取之念而退而致養於兩親固可見其爲孝而其意蓋亦浚自咎於無知人之鑑而誤就賊幕也尤豈是人所可及也

後幾年 英廟己丑上息覽精忠錄廣覓中外他無
所藏道臣取進公所受 賜件僅保於回祿之餘者
宸衷曠感命贈公下大夫職而收用其祀孫此實朱
子所謂慇懃褒錄以爲臣子之勸者而銓官奉行不
能盡其將願祀孫竟未蒙 恩澤深可慨惜也公後
孫滢從我遊一日持示公行錄而求爲之狀余實無
文病又有強不得者遂略書此于卷末以致欽尚之
意焉

靜一堂集跋

嗚呼此靜一堂遺稿者坡平尹光漢明直內子孺人

姜氏所著也自古固多有女士之稱而女紅之暇潛心根究乎聖賢經傳其論說操心修身之要處事接物之方不失儒家正路如孺人者蓋所未聞况其貧病平生實有人不能堪者耶苟非靜一之至何以有是所謂尺牘皆所以勸勉戒勗於其夫子者而溫柔之中又甚正直使讀之者自不覺其肅然明直之明師畏友豈待他求此明直所以叩益已有年而悲慟不能已者也明直袖示余曰不忍使之泯沒以活字印出願得一言以爲重顧余非其人而老病濱死久廢筆研且洪洗馬直弼爲作墓誌敘述甚詳而編爲

附錄余又何以贅焉第念孺人晉山大姓其內外世
德宐其有孺人而閨閣中希聖之工可以愧世之爲
丈夫而無立志者矣然則斯稿之刊固知非孺人之
意而其可終已耶但孺人多舉而不育紹述無人足
可悲也明直倘能不以衰耗自沮而務進德學毋負
其平日期望則所以慰泉下之心豈不有大於刊斯
稿耶幸須勉之也

書學生梁公行狀後

世固有資性真淳行誼篤厚而生長僻鄉身名埋沒
者昔賢之以無好人三字爲非有道之言其不以是

耶今讀此梁公家狀益驗其然矣公名翼天自號鋤
隱南原人 成廟朝名臣訥齋文襄公諱誠之其遠
祖也公稟賦過人孝友因心事親從兄克盡誠敬至
於峽俗觀感變其質質而方在童幼之年能愉色幾
諫不使有過舉者又豈非古所罕聞者耶經義之難
解禮文之可疑必思講質不以衰老而自己開塾購
書訓誨諸子鄉鄰亦有賴而有成者其用心之勤蓋
有人所不可及者先隴之禁護賢祖之俎豆竭力周
章靡有遺憾揭示諸子二十條卽范益謙座右銘之
意而其身教也若公者豈非子夏氏所謂吾必謂之

者耶惜乎使公早得周旋於先生長者之後奚但止於斯而已公之子涵抱狀而來求爲不朽之圖累返不置余固非其人且老病謝筆硯已久感其勤意遂略書此於狀後而歸之後之尚德者庶有以考信焉

書晉州姜氏世稿後

沔川士人姜君秦錫持示其先稿曰願得一言以爲重卽東湖逍遙堂新安三世也東湖公勲績之著逍遙公志節之高新安公德業之茂見重於當世起欽於後人則詩文之出於其手者不可不傳而誦讀者自知愛翫固無待於稱述况余陋拙無文乎且考閱

其詩什所與唱酬者靜菴退溪圭菴栗谷諸先生而
餘皆一時名勝此真所謂不見其山願見其木者也
開卷已不覺歛衽誰復有夏以重之者哉逍遙稿有
敬次宋禮正一絕其遺事一段又有可以想得禮
正公實蹟者余禮正公之後裔也所以撫卷興感實
有異於人者雖不敢論及詩文亦不可終無一言遂
強病書此于卷末以歸之

活溪集跋

活溪先生李公大邑詩文摠若干篇附以公狀碣挽
誄諸文字及寧川書院上樑文及 宣額時賜祭文

爲一冊者刊印已有年所而華菴李公爲之序矣公
後孫集馨復得公之文燬逸者數篇而添入兼付公
胤子東林公以恂詩幾首於卷末將重刊之來謂余
曰願得一言以重之余之荒拙顧非其人况舊序稱
之以鳳凰一毛並論其世溯淵源於靜菴而贊歎之
余又何以贅焉但讀其狀而詳其徽蹟則殊不勝固
陋之幸仍知其嘉言宜多可傳而今寂寥如是則又
不覺慨惜之深後之閱是卷者亦必有同余懷者矣
若東林詩什聲病華實非余所敢知而其濡染於家
庭而淺得乎性情之正者其將舍是而他求哉李君

之合編甚得其宏而誠勤之意可謂無忝尤可嘉也
書忠壯公諸將軍家乘後

余嘗讀野史知諸將軍沫殉國於壬辰倭難而所
記甚略又聞其嘗顯靈于星山而所誦傳一絕句其
幽鬱煩冤有可想者亦無以得其顛末常切固陋之
歎向者西土潢池之變挺身赴難力戰致命者諸僉
使景或是其後裔云爾則又知忠義不失其傳而將
軍有孫矣欽歎之外甚恨生並一世不得一面於僉
使而仍詳將軍實蹟歲癸未夏僉使之胤安國赴任
南海迂路見訪亟與延接而語及則曰非造次所可

既家乘略備他日當以奉覽而請爲之狀余以無文
且病昏謝之越三年春以其官守無以離次遣其男
未冠者以幣至其意可謂勤矣余取其家乘讀先
朝賜祭文及壬子七月傳教將軍之始終本末盡在
是焉嗚呼記述事行可以示後則雖得之於尋常人
亦云幸矣况闡發褒贈之宸翰將垂耀於無窮者
耶嗚呼將軍以微末微官倡義討賊屢立奇功遂膺
刳救之擢聲名出於一時諸人之右而及大寇繼至
孤城絕援凌知其不得保守則乃北望痛哭挺槍突
戰而死之成敗之數實係於天而其雄勇之姿忠烈

之性固可謂邁倫矣苟不如是其何以曠感宸衷
獲蒙崇報之典於數百年沈晦之餘也將軍殺賊未
盡責恨九原則英魂毅魄宜其久而不散而其所以
顯靈者夫豈欲據其幽鬱而已蓋顯晦屈伸自有其
時而久屈者將伸故先有此特異事而爲之兆觀於
其誦傳絕句而曰幽幽淩之幽也又曰當後有可知
之時可知其然歟若僉使稟賦異凡自幼少已能孝
於親既幽身移以忠於國其爲邊將虞侯不以官
卑而自小專意奉公隨事殫誠其用心固有可知者
而其以土俗之賀賀創書堂立訓長以訓羣蒙尤豈

可以尋常一邊將視之者哉其杖劔西下也就其所
相識索酒痛飲喟然長歎曰吾受國厚恩非死何
以報仍與訣別送者不覺下淚其死於王事乃其素
所蓄積而非一時慷慨激發之比也其賈勇先登不
知有身有不必爲之屑屑言者矣凡孫有名祖而謂
其克繩武則於孫爲榮矣祖有賢孫而謂其有所授
則于祖增光矣然則將軍與僉使之爲祖爲孫果何
如哉 聖朝之褒錄於僉使者靡有餘憾而以其事
力不逮未及延諡於將軍 命助需而亟行之於其
葬前又是 特恩也瞻聆攸及其孰不聳然正朱子

所謂以爲臣子之勸使興起其忠義之良心者而將軍祖孫亦應感泣於冥冥之中矣諸氏漆原人其先蓋自中國來而系出於漢之諸葛武侯諸氏忠孝不但將軍祖孫而已將軍從子武科弘祿與將軍同倡義旅而立僅於丁酉晉陽之戰錄勳 贈兵曹叅判從曾孫命哲至行升聞 贈司憲持平實蹟載於固城邑誌靈芝醴泉之未嘗無根源豈不信然哉今南海君登科調用進塗方闢其砥礪圖報觀法近當自勉之而所以闡揚先徽可徵於久遠者亦不在他矣余病不能副其所懇而撫卷感慨不可終無一言遂

書此于後以歸之

書全生錫正所藏尤菴筆蹟後

沃川全生錫正汝方久從我遊一日持示吾先子尤菴文正公筆蹟一帖而曰此吾外先受學於老先生之門獲蒙書贈寶藏傳世而漢湖金文元公嘗爲之識之者也外家後承不幸殘替嗣守者方在冲齡而已不免於傷汗則恐遂至於遺失故錫正請得於外王母而補弊謹藏有年矣願得一言以詳其顛末余盥手奉翫手澤如新殊不勝感慕仍竊念此所書者蓋出於期勉之意則其得此於大賢之門豈人人之

所可能者耶然則其所以寶藏傳世者固不但爲先生心畫之貴重而已也然此等寶藏終始於一家自古罕然此實爲之慨惜者而能葆守翫釋以毋墜乎祖先所以尊奉之意則顧何間於內外孫也全生其勉之哉

書副摠管邊公實蹟後

嗚呼此故副摠管邊公諱忠範記實之蹟也公之考忠壯公當壬辰亂與趙重峯高霽峯諸賢先後立殮於錦山吾先祖文正公表其墓公以忠義家後人冲年遭難父子隔絕親骸未收至痛竊天抱持訣書終

身銜恤公於是乎孝子矣及出身立朝累典郡邑治
民訓兵無不周優繡褰道啓遂至陞秩公於是乎良
吏矣昏朝戮倫之日見白沙李相公之獻議遠竄痛
哭國事斂退江湖漁釣爲徒公於是乎正人矣 仁
廟改玉復廟朝行丁卯亂後恥淩 朝家之與虜講
和歲壬申上備禦八條疏而繼以斥和之義縷縷陳
白痛秦檜之誤國戒趙宋之覆轍指陳利害痛辨義
理凜凜乎尊周却秦之風公於是乎烈士矣嗚呼當
時之居官任職者皆能如公之志則豈復有丁丑南
漢之辱也哉公之後孫處復齋示余要闡發幽潛而

老病因循幽明遠隔遂撫卷愴涕而略書之如此

雜著

百千齋說

韓君公翰請名其讀書之室余取中庸己百己千之意以百千副之而韓君復求勉戒語余病昏甚不得爲長語遂書言顧行行顧言兩句以貽之噫百千其功而至於言行相顧則工夫可謂成矣但以余慵懦空疎而以此勉人則寧不內愧耶幸君勿以勉之者非其人而盡心焉

循齋說

咸安趙君溘秀而與其族姪周植來雷一日謂余曰
吾里中有一書齋一里之所共者而居是里者皆吾
趙也諸父兄以督率後進攻業于是責之于溘所不
敢辭者而齋未有扁願得一字揭之以爲警省之地
余取朱夫子勤謹二字循之而上有無限好事之語
書循齋二字以貽之秀而又曰誠好矣然苟不爲之
說則人之見之者或未能知其義矣敢以爲請噫朱
子之於受之猶有吾雖未敢言之云則余之爲秀而
而誦之者已不免不知有躬不逮之恥矣又安得爲
之說乎然誦前言有異於創已說且旣不能躬行而

又不以道之於朋儕則其流恐將至於廢講討而不
但負秀而勤求之意也其可乎嗚呼舍此二字百事
無可做得成者况讀經傳而求進益乎秀而其勉之
哉歸而質諸里中諸長老亦必不以爲不可也

申相柘名字說

申風山滄國老以七旬之年越數舍冒積雪訪余於
病伏中因謂余曰某之子將冠以柘爲名而字道山
所居稍遠不敢奉邀於冠席而幸賜一言以教之區
區之願也余於國老世戚兩切念昔吾先子文正公
嘗爲君高祖舟村公往戒其胤之冠矣余今老且病

雖未得強赴西階之末其於名字之說何可以陋拙
辭按字書曰柘重百二十斤所以字之者主於厚重
而兼取積累之意於思傳一卷石之多也竊惟申氏
世德之懿有重且大焉者若舟村公之純孝大義海
谷公之學行文章實爲後學之所取重景行矧乎爲
其後承者耶然苟欲任其重而造其高則非有積累
之功何以能之朱夫子語學者曰荷百十斤擔相似
須着筋骨擔名公之勉大德有爲山九仞功虧一簣
之語柘乎今有成人之責矣須服朱子之訓念名公
之戒而無少退托思無忝於二祖則庶不負乃翁命

名之意勉之哉勉之哉且乃翁之自號蓋有取於舟
村公賜諡時 思教而實關乎世德之重山之一字
尤豈非祐也之所可銘心者耶遂書此以歸之用代
祝辭焉

栗圃精舍說

成君忠兼守其先祖華隱公遺址而扁其精舍曰栗
圃要余寫之豈以華隱公之避地于斯其節有似乎
陶靖節故取栗里之栗字耶抑以華隱公之王考聽
竹公學于栗谷先生之門故特揭栗字以寓尊慕之
意耶未知忠兼之意果安在然節義是道學中一事

而非別件也。出入寓日常思，所以無忝則修乎身者，自不得不勉而可以垂裕於後昆矣。余忝拙強副，仍書此以識之。

讀書說

琴生錫老永叟以贄來請學。余之陋劣非傳道解惑者，則於人固不敢聽其執贄。而若相從講討，亦有所不能辭者矣。况有世分如生者乎？遂畱而讀大學，求聞讀書之要。余應之曰：此書有讀法，詳且備。要何他？求生曰：是則專論大學而已。且今之爲士者，汨沒科目，雖未嘗不讀書，罕見有讀書之效。竊以是病之，願

得一言以自警省焉余曰然夫讀書將以修身也而治舉業者急於榮利專事記誦剽竊而不究聖賢所以立言之旨故書自書我自我而無得於身心其弊不但程子所謂買櫝還珠而已子能以是爲病則可謂知所趨向矣然程子曰凡看文字先須曉其文義然後可求其意未有文義不曉而見其意者也此又豈非初學之所當知者耶文義之曉不曉惟在於讀之之如何今此讀法固是專論大學其曰暗誦默思反覆研究未上口時須教上口未通透時須教通透已通透後便要純熟又曰豈在看他言語正欲驗之

於心云者推之他書莫不皆然舍此而別求其要則非余之所敢知也且朱子教人讀書使之正其音讀舒緩不迫令字字分明而以貪多務廣涉獵鹵莽爲戒從事於斯乃可得力可不勉哉生曰唯唯於其歸書其說以貽之仍勸先讀擊蒙要訣以及他書爲其切近而易知也他日重會當見其進益余將刮目而待焉

一墨贈琴家一童子說

琴君永叟來與相守屢日聞其男吉者能課讀而年近吾兩孫問其才分之如何共業之爲誰則曰共業

者庶從祖少子名哲吉也齒先一歲敏悟不及故同
時入學而所業哲也居前觀吉之意似以其齒先而
業後爲恥余曰然敏悟者固可愛而知恥者又可喜
學業之成與不成由於勤與不勤知恥則能發憤發
憤則必致勤勤而有成何敏悟之不若時適有饋余
墨者以二笏使歸以賞敏悟勉知恥而仍呼兩孫兒
語之曰琴家二童年與汝相若而學非汝可及汝亦
知恥乎二童子鑿吾兩孫皆能成立而相從講世好
於他日則豈非可喜之甚者但恨余老無以見之也

勤謹二字說贈族孫翊洙兄弟

朱子曰勤謹二字循之而上有無限好事反之而下有無限不好事噫凡事之好不好其所欲惡乃人之常情而非發於私者也雖一事之微亦莫不然况所謂無限者耶然所謂無限者其機只在於勤謹二字循反之間而所以循之反之者心也維持此心不使放逸莫如讀書非讀書而多識前言往行所以循之者何以得其宐然則讀書實爲勤謹之根本也族孫翊洙兄弟方專意讀書而要余一言相勉勤謹二字實余所未敢言者而亦不得不爲之奉誦焉

剛齋先生集卷之六

[Faint vertical text columns, likely bleed-through from the reverse side of the page]







